

韦苏州集

韦应物

文硕阁

wenshuoge.com

目录

关于我们	3
提要	5
原序	6
卷一	7
卷二	14
卷三	23
卷四	32
卷五	42
卷六	52
卷七	61
卷八	71
卷九	81
卷十	85

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部二

韦苏州集 别集类一【唐】

提要

【臣】等谨案韦苏州集十卷唐韦应物撰应物京兆人新旧唐书俱无传宋姚宽西溪丛语载吴兴沈作喆为作补传称应物少游太学当开元天宝间充宿卫扈游幸颇任侠负气兵乱後流洛失职乃更折节读书由京兆功曹累官至苏州刺史太仆少卿兼御中丞为诸道盐铁转运江淮留後年九十余不知其所终先是嘉佑中王钦臣校定其集有序一首述应物事迹与补传皆合惟云以集中及时人所称推其任宦本末疑止於苏州刺史考刘禹锡集有苏州举韦中丞自代状则钦臣为疎略矣李观集有上应物书深言其躁而李肇国史补云应物性高洁解食寡若所居焚香扫地而坐二说颇异盖狷洁之过每伤峭刻亦事理所兼有也其诗不如五言近体不如古体五言古体源出於陶而融化於三谢故真而不朴华而不绮但以为步趋柴桑未为得实如乔木生夏凉流云吐华月陶诗安有是格耶此本为康熙中项纲以宋槧翻雕即钦臣所校定首赋次襍拟次燕集次寄赠次送别次酬答次逢遇次怀思次行旅次感叹次登眺次游览次襍兴次歌行凡为类十四为篇五百七十一原序乃云分类十五殊不可解然字画精好远胜毛氏所刻四家诗本故今据以着録其毛本所载拾遗数首真伪莫决亦不复补入焉乾隆四十三年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

韦苏州集原序

韦苏州唐史不载其行事林宝姓纂云周逍遥公复之後左仆射扶阳公待价生司门郎中令仪令仪生銮銮生应物应物生监察御史河东节度掌书记庆复李肇国史补云为性高洁鲜食寡欲所居焚香扫地而坐其为诗驰骤建安已还各得风韵详其集中诗天宝时扈从游幸疑为三卫永泰中任洛阳丞京兆府功曹大历十四年自鄆县令制除栢阳令以疾辞归善福精舍建中二年由前资除比部员外郎出为滁州刺史改刺江州追赴阙改左司郎中贞元初又历苏州罢守寓居永定精舍其後事迹究寻无所见肇又云开元以後位卑而著名者李北海王江宁李馆陶郑广文元鲁山萧功曹张长史独孤常州崔比部梁补阙韦苏州以集中事及时人所称考其仕宦本末得非遂止於苏邪案白居易苏州答刘禹锡诗云敢有文章替左司左司盖谓应物也官称亦止此有集十卷而缀叙猥并非旧次矣今取诸本校定仍所部居去其杂厕分十五总类合五百七十一篇题曰韦苏州集【旧或云古风集别号澧上西斋吟藁者又数卷】可以缮写嘉佑元年十二月二十二日太原王钦臣序

卷一

钦定四库全书

韦苏州集卷一

唐 韦应物 撰

古赋

冰赋

夏六月白日当午火云四至金石灼烁玄泉潜沸虽深居广厦珍簟轻箴而亦郁郁燠燠不能和平其气陈王於是登别馆散幽情招亲友以高会尊仲宣为客卿睹颁冰之适至喜烦暑之暂清王乃夸宾而歌曰含皎皎兮琼玉姿气凄凄兮夺天时饮之莹骨兮何所思可进於宾请客卿为寡人美而赋之客诺曰美则美矣而大王不识其短夫谓之琼玉窃名器也气夺天时干陰阳也内热饮之媒其疾也宠一物而三失德且出寒暑而至下荐宗庙而至高仆窃感之而歔歔安得而不为之抽毫何积陰之胜纯阳兮惟此玄冰居炎天之赫赫兮独严厉乎棱棱其始也月玄冥日北陆天地闭水泉缩动静一变刚柔反覆壮以烈风积如羣玉由是依广澶漫凭高崢嶸大寒御节万物潜形浮彩浩浩仰吞素灵羣山早曙陰壑夜明古者祭之黑牡其藏以节祓之桃弧其出以洁今明明大魏礼物必备实大王罇俎之常品非小民造次之所致若尊卑异等颁命有度碎似坠琼方如截璐况粉壁云矗象筵霜布座有丽人皎然俱素虽衆宾之同辉谅为物之难固其窃名假质以谬一时之赏也如此若乃对修竹临方塘俾炎作寒兮反我天常嗟絺綌之失御於三伏兮亦纨扇委篋而内伤其严沍之威以干陰阳之候也如此若皎洁的皪与时消释或沉珠於杯或化璞於液王将甘饮聊以自适岂知乎一寒一温日夜相激久之以生疾兮内外不和而忧惕其翫意而媒疾也如此观其劣足以凄一室利庖厨俾甘肥晚败醇釀不渝非可调湊理安营魄奈何以夸客陈王於是絶然而慙曰寡人生於深宫懵於服食左右唯燕姬赵女侈服美色微客卿之言则何以雪余惑方当命有司而撤冰书盘盂以自式

杂拟

拟古诗十二首

其一

辞君远行迈饮此长恨端已谓道里远如何中险艰流水赴大壑孤云还暮山无情尚有归行子何独难驱车背乡园朔风【一作吹】卷行迹严冬霜断肌日入不遑息忧欢【一作惧】客髮变寒暑人事易中心君讵知冰玉徒贞白【客一作容】

其二

黄鸟何关关幽兰亦靡靡此时深闺妇日照纱【一作绮】窗里娟娟双青蛾微微启玉齿自惜桃李年误身游侠子无事久离别不知今生死

其三

峩峩高山巅浼浼青川流世人不自悟驰谢如惊飙百金非所重厚意良难得旨酒亲与朋芳年乐京国京城繁华地轩盖凌晨出垂杨十二衢隐映金张室汉宫南北对飞观齐白日游泳属芳时【一云游冶咏康时】平生白云毕

其四

绮楼何氛氲朝日正杲杲四壁含清风丹霞射其牖玉颜上哀啖绝耳非世有但感离恨情不知谁家妇孤云忽无色边马为回首曲绝碧天高余声散秋草徘徊帷中意独夜不堪守思逐朔风翔一去千里道

其五

嘉树蔼初绿靡芜吐幽芳君子不在赏寄之云路长路长信难越惜此芳时歇孤鸟去不还缄情向天末

其六

月满秋夜长惊鸟号北林天河横未落斗柄当西南寒蛩悲洞房好鸟无遗音商飊一夕至独宿怀重衾旧交日千里隔我浮与沉人生岂草木寒暑移此心

其七

酒星非所酌月桂不为食虚薄空有名为君长叹息兰蕙虽可怀芳香与时息岂如凌霜叶岁暮霭颜色折柔将有赠延意千里客草木知贱微所贵寒不易

其八

神州高爽地遐瞰靡不通寒月野无绿寥寥天宇空阴阳不停驭贞脆各有终汾沮何鄙俭考盘何退穷反志解牵局无为尚劳躬美人夺南国一笑开芙蓉清镜理容【一作云】髮褰帘出深重艳曲呈皓齿舞罗不堪风慊慊情有待赠芳为我容可嗟青楼月流影君帷中

其九

春至林木变洞房夕含清单居谁能裁好鸟对我鸣良人久燕赵新爱移平生别时双鸳绮留此千恨情碧草生旧迹緑琴歇芳声思【一作愿】将魂梦欢反侧寐不成攀衣迷所次起望空前庭【一云攀衣迷处所夕起望前庭】孤影中自恻不知双涕零

其十

秋天无留景万物藏光辉落叶随风起【一作远】愁人独何依华【一作明】月屡圆缺君还浩无期如何雨絶天【一云如何云雨絶】一去音问【一作尘】违

其十一

有客天一方寄我孤桐琴迢迢万里隔托此传幽音冰霜中自结龙凤相与吟弦以明直道【一云弦以昭清直】漆以固【一作形】交深

其十二

白日淇上没空闺生远愁寸心不可限淇水长悠悠芳树自妍芳【一云自交结又云房树正妍郁】春禽自相求徘徊东西厢孤妾谁与侑年华逐丝泪一落俱不【一作难】收

杂体五首

沉沉匣中镜为此尘垢蚀辉光何所如月在云中黑南金既雕错鞶带共辉饰空存【一作有】鉴物名坐使妍蚩惑美人竭肝胆思照冰玉色自非磨莹工日日空叹息古宅【一作宇】集祆鸟羣号枯树枝黄昏窥人室鬼物相与期居人不安寝搏擊思此时岂无鹰与鸇饱肉不肯飞既乖逐鸟节空养凌云姿孤奉肉食恩何异城上鷗春罗双鸳鸯出自寒夜女心精烟雾色指历千万绪长安贵豪家【一作室】妖艷不可数裁此百日功唯将一朝舞舞罢复裁新岂【一作宁】思劳者苦

同声自相应体质不必齐谁知贾人铎能使大【一作音】乐谐铿锵发宫徵和乐变其哀人神既昭享凤鸟【一作皇】亦下来岂非至贱物一奏升天阶物情苟有合莫问玉与泥

碌碌荆山璞卞和献君门荆璞非有求和氏非有恩所献知国宝至公不待言是非吾【一作语】欲默此道今岂存

与友生野饮效陶体

攜酒花林下前有千载坟於时不共酌奈此泉下人始自翫芳物行当念徂春聊舒远世踪坐望还山云且遂一懽笑焉知贱与贫

效何水部二首

玉宇含清【一作秋】露香笼散轻烟应当结沉抱难从兹夕眠

夕漏起遥怨虫响乱秋陰反覆相思字中有故人心

效陶彭泽

霜露悴百草时菊独妍华物性有如此寒暑其奈何掇英泛浊醪日入会田家尽醉茅檐下一生岂在多燕集

大梁亭会李四栖梧作

梁王昔爱才千古化不泯【平声】至今蓬池上远集八方宾车马平明合城郭满埃尘逢君一相许岂要平生亲入仕三十载如何独未伸英声久籍籍台阁多故人置酒发清弹相与【一作将】乐佳辰孤亭得长望白日下广津富贵良可取【一作求】竭来西入秦秋风旦夕起安得客梁陈

燕李録事

与君十五侍皇闱晓拂炉烟上赤墀花开汉苑经过处雪下骊山沐浴时近臣零落今犹【一作谁】在仙驾飘飏不可期此日相逢【一作逢君】思【一作非】旧日一杯成喜亦【一作又】成悲

淮上喜会梁川故人

江汉曾为客相逢每醉还浮云一别後流水十年间欢笑情如旧萧疎鬓已班何因北【一作不】归去淮上对【一作有】秋山

扬州偶会前洛阳卢耿主簿【应物顷貳洛阳常有连骑之游】

楚塞故人稀相逢本不期犹存袖里字忽怪鬓中丝客舍盈樽酒江行满箬诗更能连骑出还似洛桥时

贾常侍林亭燕集

高贤侍天阶【一作陞】迹显心独幽朱轩骛关右池馆在东周缭绕接都城氤氲望嵩丘羣公尽词客方驾永日游朝旦气候佳逍遥写烦忧緑林霭已布华沼澹不流凌露摘幽草涉烟翫轻舟圆荷既出水广厦可淹留放神遗所拘觥罚屡见酬乐燕良未极安知有沉浮醉罢各

云散何当复相求

月夜会徐十一草堂

空斋无一事岸帻故人期暂辍观书夜还题翫月诗远钟高枕後清露卷帘时暗觉新秋近残
河欲曙迟移疾会诗客元生与释子法朗因贻诸祠曹

对此嘉树林独有戚戚顔抱瘵知旷职淹旬非乐闲释子来问讯诗人亦扣关道同意【一作
适】暂遣客散疾徐还园径自幽静玄蝉噪其间高牕瞰远郊暮色起秋山英曹幸休暇恨恨
【一作恨恨】心所攀

慈恩伽蓝清会

素友俱薄世屡招清景赏鸣钟悟音闻宿昔心已往重门相洞达高宇亦遐【一作通】朗岚
岭晓城分清陰夏条长【一作清条夏陰长】氤氛芳台馥萧散竹池广平荷随波泛回飙激
林响蔬食遵道侣泊怀遗滞想何彼尘昏人区区在天壤

夜偶诗客操公作

尘襟一萧洒清夜得禅公远自鹤林寺了知人世空惊禽翻暗叶流水注幽丛多谢非玄度聊
将诗兴同

与韩库部会王祠曹宅作

闲【一作闭】门?堤柳秋渠含夕清微风送荷气坐客散尘纓守默共无恹抱冲俱寡营良时
颇高会琴酌共开情

晦日处士叔园林燕集

遽看萸叶尽坐阙芳年赏赖此林下期清风涤烦想始萌动新煦佳禽发幽响岚岭对高斋春
流灌蔬壤罇酒遗形迹道言屡开獎幸蒙终夕懽聊用税归鞅

扈亭西陂燕赏

杲杲朝阳时悠悠清陂望嘉树始氤氲春游方浩荡况逢文翰侣爱此孤舟漾緑野际遥波横
云分叠嶂公堂日为倦幽襟自兹旷有酒今满盈愿君尽弘量

西郊燕集

济济衆君子高宴及时光羣山霭遐瞩緑野布熙阳列坐遵曲岸披襟袞兰芳野庖荐嘉鱼激
涧泛羽觞衆鸟鸣茂林緑草延高冈盛时易徂谢浩思坐飘扬眷言同心友兹游安可忘

春宵燕万年吉少府中孚南馆

始见斗柄回复兹霜月霁河汉上纵横春城夜迢递宾筵接时彦乐燕凌芳岁稍爱清觞满仰
叹高文丽欲去返郊扉端为一欢滞

滁州园池燕元氏亲属

日暮游清池疎林罗【一作笼】高天余緑飘霜露夕气变风烟水门架危阁竹亭列广筵一
展私姻礼屡叹芳罇前感住在兹会伤离属颓年明晨复云去且愿此留连

郡楼春燕

衆乐杂军鞞高楼邀上客思逐花光乱赏余山景夕为郡访雕瘵守程难损益聊假一杯欢暂
忘终日迫

南塘泛舟会元六昆季

端居倦时燠轻舟泛回塘微风飘襟散横吹绕林长云澹水容夕雨微荷气凉一写惓勤意【
一云川上意】宁用诉【一作计】华觞

郡斋雨中与诸文士燕集

兵卫森画戟宴寝凝清香海上风雨至逍遥池阁凉烦痼近【一作正】消散嘉宾复满堂自
慙居处崇未覩斯民康理会是遣性达形迹忘鲜肥属时禁蔬果幸见尝俯饮一杯酒仰聆
金玉章神欢体自轻意欲凌风【一作云】翔吴中盛文史羣彦今汪洋方知大藩地【一作
盛】岂曰财赋疆

奉同郎中使君郡斋雨中宴集之什州民朝议郎行饶州司户参军员外置同正员顾况

好鸟依嘉树飞雨洒高城况与数【一作古】君子列座分两楹【一作公南楹】丈雅一何
丽【一作盛】林堂含余清我公未归朝游子不待晴白云帝乡远沧江枫叶鸣拜手欲无言
零泪如【一作和】酒倾寸心已摧折别离方骨惊安得凌风翰肃肃宾天京

军中冬燕

沧海已云晏皇恩犹念勤式燕徧恒秩柔远及斯人兹邦实大藩伐鼓军乐陈是时冬服成戎

士气益振虎竹谬朝寄英贤降上宾旋罄周旋礼媿无海陆珍庭中丸劒
闌堂上鼓吹新光景不知晚觥酌岂言频单醪昔所感大醪况同忻
顾谓军中士仰答何由申

司空主簿琴席

烟华方散薄蕙气犹含露澹景发清琴幽期默玄【一作云】悟留连
白雪意断续回风度掩抑虽已终忡忡在幽素

与村老对饮

鬓眉雪色犹嗜酒言辞淳朴古人风乡村年少生离乱见话先朝如梦中

韦苏州集卷一

卷二

钦定四库全书

韦苏州集卷二

唐 韦应物 撰

寄赠上

城中卧疾知阎薛二子屡从邑令饮因以赠之

车【一作良】马日萧萧胡不枉【一作在】我庐方来从令饮卧病独何如秋风起汉【一作江】皋开户望平芜即此悵【一作稀】音素【一作表】焉知中密疎渴者不思火寒者不求水人生羈寓【一作旅】时去就当如此犹希心异迹【一作从利心迹异】眷眷存终始

听嘉陵江水声寄深上人

凿崖泄奔湍称古神禹迹夜喧山门店独宿不安席水性自云【一作为】静石中本无声如何两相激雷转空山惊贻之道门旧了此物我情

高陵书情寄三原卢少府

直方难为进守此微贱班开卷不及顾沉埋案牍间兵凶久【一作互】相践徭赋岂得闲促戚下可哀寛政身致患日夕思自退出门望故山君心傥如此携手相与还

假中对雨呈县中僚友

郤足甘【一作堪】为笑门居梦杜陵残鷺知夏浅社【一作时】雨报年登流麦非关忘收书独不能自然忧旷职緘此谢良朋

赠萧河南

厌剧辞京县褒贤待诏书鄮侯方继业潘令且门居霁後三川冷秋深【一作余】万木疎对琴无一事新兴复何如

示从子河南尉班【并序】

永泰中余任洛阳丞以扑扶军骑时从子河南尉班亦以刚直为政俱见讼於居守因诗示意府县好我者岂曠斯文

拙直余恒守公方尔所存同占朱鸟尅俱起小人言立政思悬棒谋身类触藩不能林下去祇恋府廷恩

趋府候晓呈两县僚友

趋府不遑安中宵出户看满天星尚在近壁烛仍【一作犹】残立马频惊曙垂帘却避寒可怜同宦者应【一作始】悟下流难

赠李儋

丝桐本异质音响合【一作今】自然吾观造化意二物相因缘误触龙凤啸静闻寒夜泉心神自安宅烦虑顿可捐何因知久要丝白漆亦坚

赠卢嵩

百川注东海东海无虚盈泥滓不能浊澄波非益清恬然自安流日照万里晴云物不隐象三山共分明奈何疾风怒忽若基柱倾海水虽无心洪涛亦相惊怒号在倏忽谁识变化情

寄冯着

春雷起萌蛰土壤日已疎胡能遭盛明才俊伏里闾偃仰遂真性所求唯斗储披衣出茅屋盥漱临清渠吾道亦自适退身保玄虚幸无职事牵且览案上书亲友各驰骛谁当访弊庐思君在何夕明月照广除

早春对雪寄前殿中元侍御

扫雪开幽径端居望故人犹残腊月酒更值早梅春几日东城陌何时曲水滨闻闲且共赏莫待绣衣新

赠王侍御

心同野鹤与尘远诗似冰壶见底清府县同趋昨日事升沉不改故人情上阳秋晚萧萧雨洛水寒来夜夜声自叹犹为折腰吏【一作客】可怜驄马路傍行

将往江淮寄李十九儋【余自西京至李又发河洛同道不遇】

鷺鷥东向来文鹄亦西飞如何不相见羽翼有高卑徘徊到河洛华屋未及窥秋风飘我行远与淮海期回首隔烟雾遥遥两相思阳春自当返短翮欲追随

自巩洛舟行入黄河即事寄府县僚友

夹水苍山路向东东南山豁大河通寒树依微远天外夕阳明灭乱流中孤村几岁临伊岸一鴈初晴下朔风为报洛桥游宦侣扁舟不系与心同

寄卢庾

悠悠远离别分此欢会难如何两相近反使心不安乱髮思一栉垢衣思一浣【协韵】岂如望友生对酒起长叹时节异京洛孟冬天未寒广陵多车马日夕自游盘独我何耿耿非君谁为欢

发广陵留上家兄兼寄上长沙

将违安可怀宿恋复一方家贫无旧业薄宦各飘扬执板身有属淹时心恐惶拜言不得留声结泪满裳漾漾动行舫亭亭远相望离晨苦须臾独往道路长萧条风雨过得此海气凉感秋意已违况自结中肠推道固当遣及情岂所忘何时共还归举翼鸣春阳

初发扬子寄元大校书

凄凄去亲爱泛泛入烟雾归棹洛阳人残钟广陵树今朝此为别何处还相遇世事波上舟沿洄安得住

淮上即事寄广陵亲故

前舟已眇眇欲渡谁相待秋山起暮钟楚雨连沧海风波离思满【一作远】宿昔容鬓改独鸟下东南广陵何处在寄洪州幕府卢二十一侍御【自南昌令拜顷同官洛阳】

忽报南昌令乘驄入郡城同时趋府客此日望尘迎文苑台中妙冰壶幕下清洛阳相去远犹使故林荣

经少林精舍寄都邑亲友

息驾依松岭高阁一攀缘前瞻路已穷既诣喜更延出巘听万籁入林濯幽泉鸣钟生道心暮磬【一作鹤】空云烟独往虽暂适多累终见牵方思结茅地归息期暮年

同长源归南徐寄子西子烈有道

东洛何萧条相思邈遐路策驾复谁游入门无与晤【一作出入亦无晤】还因送归客达此
絨中素屡睽心所欢岂得顔如故所欢不可睽严霜晨凄凄如彼万里行孤妾守空闺临觴一
长叹素欲何时谐

雪中闻李儋过门不访聊以寄赠

度门能不访冒雪屡西东已想人如玉遥怜马似驄乍迷金谷路稍变上阳宫还比相思意纷
纷正满空

同德精舍养疾寄河南兵曹东厅掾

逍遥东城隅双树寒葱蒨广庭流华月高阁凝余霰杜门非养素抱疾阻良讌孰谓无他人思
君岁云变官曹亮先忝陈躅慙俊彦岂知晨与夜相代不相见絨书问所如【一云所知】
酬藻当芬绚

同德寺雨後寄元侍御李博士

川上风雨来须臾满城阙迢嶢青莲界【一作宇】萧条孤兴发前山遽已净陰霭夜来歇乔
木生夏凉流云吐华月严城自有限一水非难越相望曙河【一作何】远高斋坐超忽

同德阁期元侍御李博士不至各投赠二首

庭树忽已暗故人那【一作何】不来祇应猷烦暑永日坐霜台

官荣多所系闲居亦????期高阁犹相望青山欲暮时

使云阳寄府曹

夙驾祇府命冒炎不遑息百里次云阳间阎问漂溺上天屡????气胡不均寸泽仰瞻乔树颠见
此洪流迹良苗免湮没蔓草生宿昔颓墉满故墟返喜将安宅周旋涉涂潦侧峭缘沟脉仁贤
忧斯民贱子甘所役公堂衆君子言笑思与覲

过扶风精舍旧居简朝宗巨川兄弟

佛刹出高树晨光间井中深念陈迹迨此独忉忉零落逢故老寂寥悲草虫旧宇多改构幽
篁延本藂栖止事如昨芳时去已空佳人亦携手再往今不同新文聊感旧想子意无穷

赠令狐士曹【自八月朔旦同使蓝田淹留涉季事先半日而不相待故有戏赠】

秋檐【一作霜】滴滴对床寝山路迢迢联骑行到家俱及东篱菊何事先归半日程

赠冯着

契阔仕两京念子亦飘蓬方来属追往十载事不同岁晏乃云至微褐还未充惨凄游子情风雪自关东华觞发懽颜嘉藻播清风始此盈抱恨旷然一夕中善蕴岂轻售怀才希国工谁当念素士零落岁华空

对雨寄韩库部协

飒至池馆凉霭然和晓雾萧条集新荷氛氲散高树闲居兴方澹默想心已屡暂出仍湿衣况君东城住

寄子西

夏景已难度怀贤思方续乔树落疎陰微风散烦燠伤离枉芳札忻遂见心曲蓝上舍已成田家雨新足托邻素多欲【一作愿】残秩犹见束日夕上高斋但望东原緑

县内闲居赠温公

满郭春色岚已昏鷗栖散吏掩重门虽居世网常清浄夜对高僧无一言

对雪赠徐秀才

靡靡寒欲收霭霭陰还结晨起望南端千林散春雪妍光属瑶阶乱绪陵新节无为掩扉卧独守袁生辙

西郊游宴寄赠邑僚李巽

升阳暖春物置酒临芳席高宴阙英僚衆宾寡欢悵是时尚多垒板筑兴颓壁羈旅念越疆领徒方祗役如何嘉会日当子忧勤夕西郊郁已茂春岚重如积何当返徂雨杂英纷可惜

对雨赠李主簿高秀才

迢迢曙云薄散漫东风来青山满春野微雨洒轻埃吏局劳佳士宾筵得上才终朝狎文墨高兴共徘徊

休沐东还胄贵里示端

宦游三十载田野久已疎休沐遂兹日一来还故墟山明宿雨霁风暖百卉舒泓泓野泉洁熠熠林光初竹木稍摧翳园场亦荒芜俯惊鬓已衰周览昔所娛存没恻私怀迁变伤里闾欲言少留心中复畏简书世道良自退荣名亦空虚与子终携手岁晏当来居

朝请後还邑寄诸友生

宰邑分旬服凤驾朝上京是时当暮春沐沐集友生抗志青云表俱践高世名樽酒且欢乐文翰亦纵横良游昔所希累讎夜复明晨露含瑶琴夕风殒素英一旦遵归路伏轼出京城谁言再念别忽若千里行闭合寡誼讼端居结幽情况兹昼方永展转何由平

泮上西斋寄诸友【七月中善福之西斋作】

絶岸临西野旷然尘事遥清川下迢迢茅栋上迢嶢翫月爱佳夕望山属清朝俯砌视归翼开衿纳远飈等陶辞小秩効朱方负樵闲游忽无累心迹随景超明世重才彦雨露降丹霄羣公正云集独予忻寂寥

独游西斋寄崔主簿

同心忽已别昨事方成昔幽迳还独寻緑苔见行迹秋斋正萧散烟水易昏夕忧来结几重非君不可释紫阁东林居士叔緘赐松英丸捧对忻喜盖非尘侣之所当服辄献诗代啓

碧涧苍松五粒稀侵云采去露沾衣夜启羣仙合灵药朝思俗侶寄将归道场斋戒今初服人事羣羶已觉非一望岚峯拜还使腰间铜印与心违

秋集罢还途中作谨献寿春公黎公

束带自衡门奉命宰王畿君侯枉高鉴举善掩瑕疵斯民本已安工拙两无施何以酬明德岁晏不磷缁时节乃来集欣怀方载驰平明大府开一得拜光辉温如春风至肃若严霜威羣属所载瞻而忘倦与饥公堂燕华筵礼罢复言辞将从平明道憩车泮水湄山川降嘉岁草木蒙润滋孰云还本邑怀恋独迟迟

闲居赠友

补吏多下迁罢归聊自度园庐既芜没烟景空澹泊闲居养痾瘵守素甘葵藿顏鬓日衰耗冠带亦寥落青苔已生路緑筠始分箨夕气下遥陰微风动疎薄草玄良见诮杜门无请托非君好事者谁来顾寂寞【一作谁能】四禅精舍登览悲旧寄朝宗巨川兄弟

萧散人事忧迢遰古原行春风日已暄百草亦复生跻阁谒金像攀云造禅局新景林际曙杂花川上明徂岁方缅邈陈事尚纵横温泉有佳气驰道指京城携手思故日山河留恨情存者

邈难见去者已冥冥临风一长恸谁畏行路惊

善福阁对雨寄李儋幼遐

飞阁凌太虚晨跻郁峥嵘惊飙触悬槛白云冒层甍太陰布其地密雨垂八紘仰观固不测俯
视但冥冥感此穷秋气沉郁命友生及时未高步羈旅游帝京圣朝无隐才品物俱昭形国士
秉绳墨何以表坚贞寸心东比驰思与一会并我车夙已驾将逐晨风征郊涂住成淹默默阻
中情

寺居独夜寄崔主簿

幽人寂不【一作无】寐木叶纷纷落寒雨暗深更流萤度高阁坐使青灯晓还伤夏衣薄宁
知岁方晏离居更萧索

九日沔上作寄崔主簿倬二李端系

凄凄感时节望望临沔涘翠岭明华秋高天澄遥滓川寒流愈迅霜交物初委林叶索已空晨
禽迎飙起时菊乃盈泛浊醪自为美良游虽可娱殷念在之子人生不自省营欲无终已孰能
同一酌陶然冥斯理

西郊养疾闻畅校书有新什见赠久伫不至先寄此诗

养病惬清夏郊园敷卉木窻夕【一作户】含涧凉雨余爱筠緑披怀始高咏对琴转幽独仰
子游羣英吐词如兰馥还闻枉嘉藻伫望延昏旭唯见草青青闭门沔水曲

沔上寄幼遐

寂寞到城阙惆怅返柴荆端居无所为念子远徂征夏昼人已息我怀独未宁忽从东斋起兀
兀寻涧行冒罍丛榛密披翫孤花明旷然西南望一极山水情周览同游处逾恨阻音形壮图
非旦夕君子勤令名勿复久留燕蹉???在北京

善福精舍示诸生

湛湛嘉树陰清露夜景沉悄然羣物寂高阁似陰岑方以玄默处岂为名迹侵法妙【一作泛
如】不知归独此抱冲襟斋舍无余物陶器与单衾诸生时列坐共爱风满林

晚出沔上赠崔都水

临流一舒啸望山意转延隔林分落景余霞明远川首起趣东作已看耘夏田一从民里居岁

月再徂迁昧质得全性世名良自牵行忻携手归聊复饮酒眠

寓居泮上精舍寄于张二舍人

万木縈云出香阁西连碧涧竹林园高斋犹宿远山曙微霰下庭寒雀喧道心淡泊对流水生事萧疎空掩门时忆故交那得见晓排闾阖奉明恩

开元观怀旧寄李二韩二裴四兼呈崔郎中严家令

宿昔清都燕分散各西东车马行迹在霜雪竹林空方軫故物念谁复一樽同聊披道书暇还此听松风春日郊居寄万年吉少府中孚三原元少府伟夏侯校书审

谷鸟时一啖田园春雨余光风动林早高窗照日初独饮涧中水吟咏老氏书城阙应多事谁忆此闲居

泮上醉题寄洺武

芳园知夕燕西郊已独还谁言不同赏俱是醉花间

西郊期洺武不至书示

山高鸣过雨涧树【一云林涧】落残花非关春不待当由期自賒

泮上对月寄孔谏议

思怀在云阙泊素守中林出处虽殊迹明月两知心

将往滁城恋新竹简崔都水示端

停车欲去绕縈竹偏爱新筠十数竿莫遣儿童触琼粉留待幽人回日看

还阙首途寄精舍亲友

休沐日云满冲然将罢观严车候门侧晨起正【一作整】朝冠山泽含余雨川涧注惊湍揽辔遵东路【一云登前路】回首一长叹居人已不见高阁在林端

秋夜南宫寄泮上二弟及诸生

暝色起烟阁沉抱积离忧况兹风雨夜萧条梧叶秋空宇感凉至颓颜惊岁周日夕游阙下山

水忆同游涂中书情寄沔上两弟因送二甥却还

华簪岂足恋幽林徒自违遥知别後意寂寞掩郊扉回首昆池上更羡尔同归

雪後【一作夜】下朝呈省中一絕

南望青山满禁闱晓陪鸳鹭正差池共爱朝来何处雪蓬莱宫里拂松枝

韦苏州集卷二

卷三

<集部,别集类,汉至五代,韦苏州集>

钦定四库全书

韦苏州集卷三

唐 韦应物 撰

寄赠下

寄柳州韩司户郎中

达【一作远】识与昧机智殊迹同静於焉得携手屡赏清夜景萧洒陪高咏从容羨华省一
逐风波迁南登桂阳岭旧里门空掩欢【一作新】游事皆屏怅望城阙遥幽居时序永春风
吹百卉和煦变闾井独闷终日眠篇书不复省唯当望雨露沾子荒遐境

寄令狐侍郎

三山有琼树霜雪色逾新始自风尘交中结绸缪姻西掖方掌诰南宫复司春夕燕华池月朝
奉玉阶尘衆宝归和氏吹嘘多俊人羣公共然诺声问迈时伦孤鸿既高举鷺雀在荆榛翔集
且不同岂不欲殷勤一旦迁南郡江湖渺无垠宠辱良未定君子岂缁磷寒暑已推斥别离生
苦辛非将会面日书札何由申

闲居寄端及重阳

山明野寺曙钟微雪满幽林人迹稀门居寥落生高兴无事风尘独不归

园林晏起寄昭应韩明府卢主簿

田家已耕作井屋起晨烟园林鸣好鸟闲居犹独眠不觉朝已晏起来望青天四体一舒散情
性亦忻然还复茅檐下对酒思数贤束带理官府简牍盈目前当念中林赏览物遍山川上非
遇明世庶以道自全

寄大梁诸友

分竹守南谯弭节过梁池雄都衆君子出饥拥河湄燕谿始云洽方舟已解维一为风水便但
见山川驰昨日次睢阳今夕宿符离云树怱重叠烟波念还期相敦在勤事海内方劳师

新秋夜寄诸弟

两地俱秋夕相望共【一作在】星河高梧一叶下空斋归思多方用忧人瘼况自抱微痼无
将别来近颜鬓已蹉????

郊园闻蝉寄诸弟

去岁郊园别闻蝉在兰省今岁卧南谯蝉鸣归路永夕响依山郭余悲散秋景【一作余声发
秋岭】缄书报此时【一作远景】此心方耿耿

寄中书刘舍人

云霄路竟别中年迹暂同比翼趋丹陛连骑下南宫佳咏邀清月幽赏滞芳丛迨予一出守与
子限西东晨露方怆怆【一作苍】离抱更忡忡忽睹九天诏秉纶归国工玉座浮香气秋禁
散凉风应向横门渡【一作旁】环佩杳玲珑光辉恨未瞩归思坐难通苍苍松桂姿想在掖
垣中

郡斋感秋寄诸弟

首夏辞旧国穷秋卧滁城方如昨日别忽觉徂岁惊高阁收烟雾池水晚澄清【一作明】户
牖已凄爽晨夜感深情昔游郎署间是月天气晴【一作清】授衣还西郊晓露田中【一作
野】行采菊投酒中昆弟自同倾簪组聊挂壁焉知有世荣一旦居远郡山川间音形大道庶
无累及兹念已盈

郡中对雨赠元锡兼简杨凌

宿雨冒空山空城响秋叶沉沉暮色至凄凄凉气入萧条林表散的皦荷上集夜雾着衣重新
苔侵履湿遇兹端忧日赖与嘉宾接

冬至夜寄京师诸弟兼怀崔都水

理郡无异【一作美】政所忧在素飧徒令去京国羈旅当岁寒子【一作玄】月生一气阳
景极南端已怀时节感更抱别离酸私燕席【一作夕】云罢还斋夜方阑邃幕沉空宇【一
作月】孤烛照床单应同兹夕念宁忘故岁欢川涂恍悠邈涕下一阑干

元日寄诸弟兼呈崔都水

一从守兹郡两鬓生素发新正加我年故岁去超忽淮滨益时候了似仲秋月川谷风景温城
池草木发高斋属多暇怊怅临芳物日月昧还期念君何时歇

寄职方刘郎中

相闻二十载不得展平生一夕【一作旦】 南宫遇聊用写中情端服光朝次羣列慕【一作器】 英声归来坐粉闱挥笔乃纵横始陪文翰游欢燕难久并予因谬忝出君为沉疾婴别离寒暑过荏苒春草生故园兹日隔新禽池上鸣郡中永无事归思徒自盈

社日寄崔都水及诸弟羣属

山郡多暇日社时放吏归坐阁独成闷行塘阅清辉春风动高柳芳园掩夕扉遥思里中会心绪怅微微

寒食日寄诸弟

禁火暖佳辰念离独伤抱见此野田花心思杜陵道联骑定【一作竟】 何时予今顔已老

三月三日寄诸弟兼怀崔都水

暮节看已谢兹晨愈可惜风澹意伤春池寒花敛夕【一作色】 对酒始依依怀人还的的谁当曲水行相思寻旧迹

赠李儋侍御

风光山郡少来看广陵春残花犹待客莫问意中人

寄杨协律

吏散门阁掩鸟鸣山郡中远念长江别俯觉座隅空舟泊南池雨簟卷北楼风并罢芳樽燕为怆昨时间

【附】杨凌奉酬寄示

淮阳【一作南】 为郡暇坐惜流芳歇散怀累榭风清暑澄潭月陪燕辞三楚戒途绵百越非当远别离雅奏何由发郡斋赠王卿

无术谬称简素飡空自嗟秋斋雨成滞山药寒始华漉落人皆笑幽独岁逾賒唯君出尘意赏爱似山家【一作僧家】

简恒灿

室【一作台】虚多凉气【一作风】天高属秋时空庭夜风雨草木晓离披简书日云旷文墨谁复持聊因遇澄静一与道人期

闲居寄诸弟

秋草生庭白露时故园诸弟益相思尽日高斋无一事芭蕉叶上独题诗

登楼寄王卿

踏阁攀林恨不同楚云沧海思无穷数家砧杵秋山下一郡荆榛寒雨中

寄畅当【闻以子弟被召从军】

寇贼起东山英俊方未闲闻君新应募籍籍动京关出身文翰场高步不可攀青袍未及解白羽插腰间昔为琼树枝【一作姿】今有风霜颜秋郊细柳道走马一夕还丈夫当为国破敌如摧山何必事州府坐使鬓毛班

赠崔员外

一别十年事相逢淮海滨还思洛阳日更话府中人且对清觞满宁知白发新忽忽何处去车马冒风尘

寄李儋元锡

去年花里逢君别今日花开已一年世事茫茫难自料春愁黯黯【一作忽忽】独成眠身多疾病思田里邑有流亡愧俸钱闻道欲来相问讯西楼望月几回圆

京师叛乱寄诸弟

弱冠遭世难二纪犹未平羈离官【一作守】远郡虎豹满西京上怀犬马恋下有骨肉情归去在何时流泪忽沾纓忧来上北楼左右但军营函谷行人絕淮南春草生鸟鸣野田间思忆故园【一作里】行何当四海晏甘与齐民耕

赠琮公

山僧一相访吏案正盈前出处似殊致喧静两皆【一作依】禅暮春华池宴清夜高斋眠此道本无得宁复有忘筌寄诸弟【建中四年十月三日京师兵乱自滁州间道遣使明年兴元甲子岁五月九日使还作】

岁暮兵戈乱京国帛书间道访存亡还信忽从天上落唯知彼此泪千行

寄恒灿

心絕去来缘迹【一作踵】顺【一作断】人间事独寻秋草径夜宿寒山寺今日郡斋闲思问楞伽字

简郡中诸生

守郡卧秋阁四面尽荒山此时听夜雨孤灯照窻间药园日芜漫书帷长自闲惟当上客至论诗一解顏

寄全椒山中道士

今朝郡斋冷忽念山中客涧底束【一作采】荆薪归来煮白石欲持一瓢酒远慰风雨夕落叶满空山何处寻行迹【慰一作寄满一作遍】

寄释子良史酒

秋山僧病冷聊寄三五杯应泻山瓢里还寄此瓢来

重寄

复寄满瓢去定见空瓢来若不打瓢破终当费酒材

答释子良史送酒瓢

此瓢今已到山瓢知己空且饮寒塘水遥将回也同【一作遥知回也风】

简陟巡建三甥【卢氏生】

忽羨後生连榻话独依寒烛一斋空时流欢笑事从别把酒吟诗待尔同

览褒子卧病一絕聊以题示【沈氏生全真】

念子抱沉疾霜露变滁城独此高窻下自然无世情

寄璨师

林院生夜色西廊上纱灯时忆长松下独坐一山僧

寄卢陟

柳叶遍寒塘晓霜凝高阁累日此留连别来成寂寞

途中寄杨邕裴绪示褒子【永阳县馆中作】

上宰领淮右下国属星驰雾野腾晓骑霜竿裂冻旗萧萧陟连冈莽莽望空陂风截鴈嘹唳云惨树参差高斋明月夜中庭松桂姿当睽一酌恨况此两旬期

宿永阳寄璨律师

遥知郡斋夜冻雪封松竹时有山僧来悬灯独自宿

雪行寄褒子

淅沥覆寒骑飘飏暗川容行子郡城晓披云看杉松

寄裴处士

春风驻游骑晚景澹山晖一问清冷子独掩荒园扉草木雨来长里闾人到稀方从广陵宴花落未言归

偶入西斋院示释子恒灿

僧斋地虽密忘子迹要賒一来非问讯自是看山花

示全真元常【元常赵氏生】

余辞郡符去尔为外事牵宁知风雪夜复此对床眠始话南池饮更咏西楼篇无将一会易岁月坐推迁

寄刘尊师

世间苒苒萦此身长望碧山到无因白鹤徘徊看不去始知下有清都人

寄庐山樛衣居士

兀兀山行无处归山中猛虎识樵衣俗客欲寻应不遇云溪道士见犹稀

因省风俗与从侄成绪游山水中道先归寄示

累宵同燕酌十舍携征骑始造双林寂遐搜洞府秘羣峰绕盘郁悬泉仰特【一作时】异陰
壑云松埋阳崖烟花媚每虑观省牵中乖游践志我尚山水行子归栖息地一操临流袂上耸
干云轡独往倦危途怀冲【一作州】寡幽致赖尔还都期方将登楼迟

寒食寄京师诸弟

雨中禁火空斋冷江上流鶯独坐听把酒看花想诸弟杜陵寒食草青青

岁日寄京师诸季端武等

献岁抱深恻侨居念归缘常患亲爱离始觉世务牵少事河阳府晚守淮南壖平生几会散已
及蹉跎年昨日罢符竹家贫遂留连部曲多已散车马不复全闲将酒为偶默以道自诮听松
南岩寺见月西涧泉为政无异术当责岂望迁终理【一作襄】来时装归凿杜陵田

简卢陟

可怜白雪曲未遇知音人栖惶戎旅下蹉????淮海滨涧树含朝雨山鸟哢余春我有一瓢酒可
以慰风尘

西涧即事示卢陟

寝扉临碧涧晨起澹忘情空林细雨至圆文遍水生永日无余事山中伐木声知子尘喧久暂
可散烦纓

登郡楼寄京师诸季淮南子弟

始罢永阳守复卧浔阳楼悬檻飘寒雨危堞侵【一作浸】江流迨兹闻鴈夜重忆别离秋徒
有盈樽酒镇此百端忧

寄黄尊师

结茅种杏在云端扫雪焚香宿石坛灵只不许世人到忽作雷风登岭难

寄黄刘二尊师

庐山两道士各在一峯居
矫掌白云表
曦发阳和初
清夜降真侣
焚香满空虚【一作庐】中
有无为乐自然与世疎
道尊不可屈
符守岂暇余
高斋遥致敬
愿示一编书

秋夜寄丘二十二员外

怀君属秋夜散步咏凉天
山空松子落幽人应未眠

【附】丘丹奉酬寄示

露滴梧叶鸣风秋
桂花发中有学仙侣
吹箫弄山月
赠丘员外二首

高词弃浮靡贞行表乡闾未真
南宫拜聊偃东山居大藩本多事
日与文章疎每一覩之子高咏
遂起予宵昼方连燕烦恹亦顿祛
格言雅诲阙善谑矜数余久局思
游旷穷惨遇阳舒虎丘愜登眺
吴门怅踌躇方此恋携手岂云还
旧墟告诸吴子弟文学为何如

迹与孤云远心将野鹤俱
那同石氏子每到府门趋

【附】丘丹奉酬

久作烟霞侣暂将簪组亲
还同褚伯玉入馆忝州人
赠李判官

良玉定为宝长材时所希
佐幕方巡郡奏命布恩威
食蔬程独守饮冰节靡违
决狱兴邦颂高文禀天机
宾馆在林表望山启西扉
下有千亩田泱泱吴土肥
始耕已见获袵絺今授衣
政拙劳详省淹留未得归
虽暂且忻愿日夕覩光辉

寄皎然上人

吴兴老释子野雪盖精庐
诗名徒自振道心长晏如
想兹栖禅夜见月东峰初
鸣钟【一作磬】惊岩壑
焚香满空虚叨慕端成旧
未识岂为疎愿以碧云思
方君怨别余茂苑文华地
流水古僧居何当一游咏
倚阁吟踌躇

赠旧识

少年游太学负气蔑诸生
蹉跎三十载今日海隅行

复理西斋寄丘员外

前岁理西斋得与君子同
迨兹已一周怅望临春风
始自疎林竹还复长榛藂
端正良难久芜秽易为功
援斧开衆郁如师启羣蒙
庭宇还清旷烦抱亦舒通
海隅雨雪霁春序风景融
时物

方如故怀贤思无穷

和张舍人夜直中书寄吏部刘员外

西垣草诏罢南宫忆上才月临兰殿出凉自凤池来松桂生丹禁鸳鹭集云台托身各有所相望徒徘徊

和李二主簿寄淮上綦母三

满城怜傲吏终日赋新诗请【去声】报淮陰客春帆浪作【音佐】期

寄二严【士良婺牧 士元郴牧】

丝竹久已懒今日遇君忺打破蜘蛛千道网总为鹄鵠两个严

韦苏州集卷三

卷四

钦定四库全书

韦苏州集卷四

唐 韦应物 撰

送别

李五席送李主簿归西台

请告严程尽西归道路寒欲陪鹰隼集犹恋鹄鵠单洛邑人全少嵩高雪尚残满台谁不故报我在微官

送崔押衙相州【顷任内黄令】

礼乐儒家子英豪燕赵风驱鷄尝理邑走马却从戎白刃千夫辟黄金四海同嫖姚恩顾下诸将指挥中别路怜芳草归心伴塞鸿邺城新骑满魏帝旧台空望阙应怀恋遭时贵立功万方如已静何处欲输忠

送宣城路録事

江上宣城郡孤舟远到时云林谢家宅山水敬亭祠纲纪多闲日观游得赋诗都门且尽醉此别数年期

送李十四山东游【一作山人东游】

圣朝有遗逸披胆谒至尊岂是贤荣宠誓将救元元权豪非所便书奏寝禁门高歌长安酒忠愤不可吞欵来客河洛日与静者论济世翻小事丹砂驻精魂东游无复系梁楚多大蕃高论动侯伯疎怀脱尘喧送君都门野饮我林中樽立马望东道白云满梁园踟蹰欲何赠空是平生言

送李二归楚州【时李季弟牧楚州被讼赴急】

情人南楚别复咏在原诗忽此嗟歧路还令泣素丝风波朝夕远音信往来迟好去扁舟客青云何处期

送阎案赴东川辟

冰炭俱可怀孰云热与寒何如结发友不得携手懽晨登严霜野送子天一端祇承简书命俯仰豸角冠上陟白云峤下冥玄壑湍离羣自有托历险得所安当念反穷巷登朝成慨叹

送令狐岫宰恩阳

大雪天地闭羣山夜来晴居家犹苦寒子有千里行行行安得辞荷此蒲壁荣贤豪争追攀饮饯出西京罇酒岂不懽暮春自有程离人起视日仆御促前征逶迟岁已穷当造巴子城和风被草木江水日夜清从来知善政离别慰友生

送冯着受李广州署为録事

郁郁杨柳枝萧萧征马悲送君灞陵岸纠郡南海湄名在翰墨場羣公正追随如何从此去千里万里期大海吞东南横岭隔地维建邦临日域温燠御四时百国共臻凑珍奇献京师富豪虞兴戎绳墨不易持州伯荷天宠【一作龙选】还当翊丹墀子为门下生终始岂见遗所愿酌贪泉心不为磷缁上将翫国土下以报渴饥

送元仓曹归广陵

官闲得去住告别恋音徽【一作輝】旧国应无业他乡到是归楚山明月满淮甸夜钟微何处孤舟泊遥遥心曲违

送唐明府赴溧水【三任县事】

三为百里宰已过十余年祇叹官如旧旋闻邑屡迁鱼盐滨海利姜蔗傍湖田到此安甿俗琴堂又晏然

喜於广陵拜覲家兄奉送发还池州

青青连枝树苒苒久别离客游广陵中俱到若有期俯仰叙存歿哀肠发酸悲收情且为欢累日不知饥夙驾多所迫复当还归池长安三千里岁晏独何为南出登阊门惊飈左右吹所别谅非远要令心不怡

送章八元秀才擢第往上都应制

决胜丈场战已酣行应辟命复才堪旅食不辞游阙下春衣未换报江南天边宿鸟生归思关外晴山满夕岚立马欲从何处别都门杨柳正毵毵

送张侍御秘书江左覲省

莫叹都门路归无驷马车绣衣犹在篋芸【一作蓬】阁已观书沃野收红稻长江钓白鱼晨
飧亦可荐名利欲何如【荐一作洁】

赋得鼎门送卢耿赴任

名因定鼎地门对凿龙山水北楼台近城南车马还稍开芳野静欲掩暮钟闲去此无嗟屈前
贤尚抱关

赋得浮云起离色送郑述诚

游子欲言去浮云那得知偏能见行色自是独伤离晚带城遥暗秋生峯尚奇还因朔吹断正
马与相随

饯雍聿之潞州谒李中丞

郁郁两相遇出门草青青酒酣拔劔舞慷慨送子行驱马涉大河日暮怀洛京前登太行路志
士亦未平薄游五府都高步振英声主人才且贤重士百金轻丝竹促飞觴夜醺达晨星娱乐
易淹暮凉在执高情

上东门会送李幼举南游徐方

离弦既罢弹罇酒亦已阑听我歌一曲南徐在云端云端虽云邈行路本非难诸侯皆爱才公
子远结欢济济都门宴将去复盘桓令姿何昂昂良马远游冠意气且为别由来非所叹

送洛阳韩丞东游

仙鸟何飘飏緑衣翠为襟顾我差池羽咬咬怀好音徘徊洛阳中游戏清川浚神交不在结欢
爱自中心驾言忽徂征云路邈且深朝游尚同啄夕息当异林出饯宿东郊列筵属城陰举酒
欲为乐忧怀方沉沉

送郑长源

少年一相见【一作得】飞辔河洛间欢游不知罢中路忽言还泠泠鵾弦哀悄悄冬夜闲丈
夫虽耿介远别多苦顔君行拜高堂速驾难久攀鷄鸣俦侣发朔雪满河关须臾在今夕罇酌
且循环

送李儋

别离何从生乃在亲爱中反念行路子拂衣自西东日昃不留宴严车出崇墉行游【一作役

】非所乐端忧道未通【一作端处道未丰】春野百卉发清川思无穷芳时坐离散世事谁可同归当掩重关默默想音容

赋得暮雨送李胄【一作渭】

楚江微雨里建业暮钟时漠漠帆来重冥冥鸟去迟海门深不见浦树远含滋相送情无限沾襟比散丝

留别洛京亲友

握手出都门驾言适京师岂不怀旧庐惆怅与子辞丽日坐高阁清觞醺华池昨游倏已过后遇良未知念结路方永岁阴野无暉单车我当前【一作去】暮雪子独归临流【一云渐遥】一相望零泪忽沾衣

赋得沙际路送从叔象

独树沙边人迹稀欲行愁远暮钟时野泉几处侵应尽不遇山僧知问谁

送榆次林明府

无嗟千里远亦是宰王畿策马雨中去逢人关外稀邑传榆石在路遶晋山微别思方萧索新秋一叶飞

杂言送黎六郎【寿阳公之子】

冰壶见底未为清少年如玉有诗名闻话嵩峰多野寺不嫌黄绶向阳城朱门严训朝辞去骑出东郊满飞絮河南庭下拜府君阳城归路山氛氲山氛氲长不见钓台水渌荷已生少姨庙寒花始徧县闲吏傲与尘隔移竹疏泉常岸帙莫言去作折?官岂似长安折?客天长寺上方别子西有道【时任京兆府功曹摄高陵宰别田曹卢康户曹韩质因而有作】

假邑非拙素况乃别伊人聊登释氏居携手恋【一作念】兹晨高旷出尘表逍遥涤心神青山对芳苑列树遶【一作盈】通津车马无时絶行子倦风尘今当遵往路伫立何由申唯持贞白志以慰心所亲

送黎六郎少府赴阳翟

试吏向嵩阳春山蹊躅芳腰垂新绶色衣满旧芸香乔树别时绿客程关外长祇应传善政日夕慰高堂

送别覃孝廉

思亲自当去不第未蹉跎???家住青山下门前芳草【一作流水】多秭归通远徼巫峡注惊波
州举年年事还期复几何

送开封卢少府

雄藩车马地作尉有光辉满席宾常待闾街烛夜归关河征旆远烟树夕阳微到处无留滞梁
园花欲稀

送槐广落第归扬州

下第常称屈少年心独轻拜亲归海畔似舅得诗名晚对青山别遥寻芳草行还期应不远寒
露湿芜城

送汾城王主簿

少年初带印汾上又经过芳草归时徧情人故郡多禁钟春雨细宫树野烟和相望东桥别微
风起夕波

送澠池崔主簿

邑带洛阳道年年应此行当时匹马客今日县人迎暮雨投关郡春风别帝城东西殊不远朝
夕待佳声

送顔司议使蜀访图书

轺驾一封急【一作传】蜀门千岭曛讵分江转字但见路缘云山馆夜听雨秋猿独叫羣无
为久留滞圣主待遗文

奉送从兄宰晋陵

东郊暮草歇千里夏云生立马愁将夕看山独送行依微吴苑树迢递晋陵城慰此断行别邑
人多颂声

赠别河南李功曹【宏辞登科拜官】

耿耿抱私戚寥寥独掩扉临觴自不饮况与故人违故人方琢磨瓊朗代所稀宪礼更右职文
翰洒天机聿【一作竭】来自东山羣彦仰余辉谈笑取高第綰绶即言归洛都游燕地千里

及芳菲今朝章台别杨柳亦依依云霞未改色山川犹夕晖忽复不相见心思乱霏霏

送五经赵随登科授广德尉

明经有清秩当在石渠中独往宣城郡高斋谒谢公寒原正芜漫【一作没】夕鸟自西东秋日不堪别凄凄多朔风

宴别幼遐与君贶兄弟

乖阙【一作乖阔】意方【一作云】弭安知忽来翔累日重欢宴一旦复离伤置酒慰兹夕秉烛坐华堂契阔未及展晨星出东方征人惨已辞车马俨成【一作来】装我怀自无欢原野满春光【一作芳】羣水含时泽野雉鸣朝阳平生有壮志不觉泪沾裳况自守空宇日夕但彷徨

送宣州周録事

清时重儒士纠郡属伊人薄游长安中始得一交亲英豪若云集饯别塞城闐高驾临长路日夕起风尘方念清宵宴已度芳林春从兹一分手缅邈吴与秦但覩年运驶安知後会因唯当存令德可以解悃勤

谢栎阳令归西郊赠别诸友生

结髮仕【一作事】州县蹉跎在文墨徒有排云心何由生羽翼幸遭明盛日万物蒙生植独此抱微痼颓然谢斯职【大历十四年六月二十三日自鄠县制除栎阳令以疾辞归善福精舍七月二十日赋此诗】世道方荏苒郊园思偃息为欢日已延君子情未极驰觴【一作驱驰】忽云晏高论良难测游步清都宫迎风嘉树侧晨起西郊道原野分黍稷自乐陶唐人服勤在微力伫君列丹陛出处两为得

送端东行

世承清白遗【一作世事留清白】躬服古人言从宦俱守道归来共闭门驱车何处去暮雪满平原

送姚孙还河中【孙一作系】

上国旅游罢故园生事微风尘满路起行人何处归留思芳树饮惜别暮春晖几日投关郡河山对掩扉始除尚书郎别善福精舍【建中二年四月十九日自前栎阳令除尚书比部员外郎】

简略非世器委身同草木逍遥精舍居饮酒自为足累日曾一栉对书常懒读社腊会高年山川恣游瞩明世方选士中朝悬美禄除书忽到门冠带便拘束愧忝郎署迹谬蒙君子録俯仰垂华缨飘飏翔轻轂行将亲爱别恋此西涧曲远峯明夕川夏雨生衆缘迅风飘野路【一作吹往路】回首不遑宿明晨下烟阁白云在幽谷

送常侍御却使西蕃

归奏圣朝行万里却衔天诏报蕃臣本是诸生守文墨今将匹马静烟尘旅宿关河逢暮雨春耕亭鄣识遗民此去多应收故地宁辞沙塞往来频

送郗詹事

圣朝列羣彦穆穆佐休明君子独知止悬车守国程忠良信旧德文学播英声既获天爵美况将齿位并书奏蒙省察命驾乃东征皇恩赐印绶归为田里荣朝野同称叹园绮郁齐名长衢轩盖集饮饯出西京时属春阳节草木已含英洛川当盛宴斯焉为达生

送苏评事

季弟仕谯都元兄坐兰省言访始忻忻念离当耿耿嵯峨夏云起迢遰山川永登高望去尘纷思终难整【一作罄】

送李侍御益赴幽州幕

二十挥篇翰三十穷典坟辟书五府至名为四海闻始从车骑幕今赴嫖姚军契阔晚相遇草戚遽离羣悠悠行子远眇眇川涂分登高望燕代日夕生夏云司徒拥精甲誓将除国氛儒生幸持斧可以佐功勲无言羽书急坐阙相思文

自尚书郎出为滁州刺史留别朋友兼示诸弟

少年不远仕秉笏东西京中岁守淮郡奉命乃征行素慙省阁姿况忝符竹荣効愚方此始顾私岂获并徘徊亲交恋怆恨昆友情日暮风雪起我去子还城登涂建隼旃勒驾望承明云台焕中天龙阙郁上征晨兴奉早朝玉露沾华缨一朝从此去服膺理庶眈皇恩悦岁月归复厕羣英

送元锡杨凌

荒林翳山郭积水成秋晦端居意自违况别亲与爱欢筵慊未足离灯悄已对还当掩郡阁伫君方此会

送杨氏女

永日方戚戚出门复悠悠女子今有行大江泝轻舟尔辈况无恃抚念益慈柔幼为长所育【
幼女为杨氏所抚育】两别泣不休对此结中肠义往难复留自小阙内训【言早无恃】事
姑贻我忧赖兹托令门仁恤庶无尤贫俭诚所尚资从岂待【一作在】周孝恭遵妇道容止
顺其猷别离在今晨见尔当何秋居闲始自遣临感忽难收归来视幼女零泪缘缨流

送中弟【一云送崔肃懿】

秋风【一作气】入疎户离人起晨朝山郡多风雨西楼更萧条嗟予淮海老送子关河遥同
来不同去沉忧宁复消

寄别李儋

首戴惠文冠心有决胜筹翩翩四五骑结束向并州名在相公幕【一作府】丘山恩未酬妻
子不及顾亲友安得留宿昔同文翰交分共绸缪忽枉别离札涕泪一交流远郡卧残疾【一
作雨】凉气满西楼想子临长路时当淮海秋

送仓部萧员外院长存

幙被蹉????老江国情人邂逅此相逢不随鸳鹭朝天去遥想蓬莱台阁重

送王校书

同宿高斋换时节共看移石复栽杉送君江浦已惆怅更上西楼望远帆

送丘员外还山

长栖白云表暫访高斋宿还辞郡邑誼归泛松江渌结茅隐苍岭伐薪响深谷同是山中人不知
往来躅灵芝非庭草辽鹤委【一作匪】池鹭终当署里门一表高阳族

【附】丘丹奉酬使君送归山之作

侧闻郡守至偶乘黄犢出不别桃源人一见经累日蝉鸣念秋稼兰酌动离瑟临水降麾幢野
艇才容膝参差碧山路日【一作月】送江帆疾涉海得骊珠栖梧慙凤质媿非郑公里归扫
蒙茏室

重送丘二十二还临平山居

岁中始再覩方来又解携才留野艇语已忆故山栖幽涧人夜汲深林鸟长啼还持郡斋酒慰子【一作此】霜露凄

【附】丘丹奉酬重送归山

卖药有时至自知往来疎遽辞池上酌新得山中书步出芙蓉府归乘轂棘车猥蒙招隐作岂媿班生庐送郑端公弟移院常州

时瞻宪臣重礼为内兄全公程悦见责私爱信不????况昔陪朝列今兹俱海壖清觴方共酌【一作笑燕】天书忽告迁岂徒咫尺地使我心思绵应当自此始归拜云台前

送房杭州【孺复】

专城未四十暂谪岂蹉????风雨吴门夜惻怆别情多

送陆侍御还越

居藩久不乐遇子聊一欣英声颇籍甚交辟乃时珍绣衣过旧里驄马辉四邻【一作辉光耀四邻】敬恭尊郡守賤简具州民?忝诚所媿思怀方见申置榻宿清夜加笾醺良辰遵涂还盛府行舫遶长津自有贤方伯得此文翰宾

听江笛送陆侍御【同丘员外赋题】

远听江上笛临觴一送君还愁独宿夜更向郡斋闻

【附】丘丹同前

离樽闻夜笛寥亮入寒城月落车马散凄惻主人情送丘员外归山居

郡阁始嘉宴青山忆旧居为君量革履且愿住篮輶

送崔叔清游越

忘兹适越意爱我郡斋幽野情岂好谒诗兴一相留远水带寒树阊门望去舟方伯怜文士无为成滞游

送云阳邹儒立少府侍奉还京师

建中即藩守天宝为侍臣历观两都士多閱诸侯人邹生乃後來英俊亦罕伦为文颇瓌丽秉

度自贞醇甲科推令名延阁播芳尘再命趋王畿请告奉慈亲一锺信荣禄可以展欢欣昆弟俱时秀长衢当自伸聊从郡阁暇美此时景新方将极娱宴已复及离辰【一云芜後乃离辰一作燕後】省署慙再入江海绵十春今日阊门路握手子归秦

送豆卢策秀才

岁交冰未泮【一作冰始泮又作冰水泮】地卑海气昏子有京师游始发吴阊门新黄含远林微绿生陈根诗人感时节行道当忧烦古来濩落者俱不事田园文如金石韵岂乏知音言方辞郡斋榻为【一作已】酌离亭罇无为倦羈旅一去高飞翻

送王卿

别酌春林啼鸟稀双旌背日晚风吹却忆回来花已尽东郊立马望城池

送刘评事

声华满京洛藻翰发阳春未遂鵷鸿举尚为江海宾吴中高宴罢西上一游秦已想函关道游子冒风尘笼禽羡归翼远守怀交亲况复岁云暮凛凛冰霜辰旭霁开郡阁宠饯集丈人洞庭摘朱实松江献白鳞丈夫岂恨别一酌且欢忻

送雷监赴阙庭

才大无不备出入为时须雄藩精理行秘府擢文儒诏书忽已至焉得久踟蹰方舟趣朝谒观者盈路衢广筵列衆宾送爵无停迂攀饯诚怆恨【一作恨】贺荣且欢娱长陪柏梁宴日向丹墀趋时方重右职蹉????独海隅

送秦系赴润州

近作新婚镊白髯长怀旧卷映蓝衫更欲携君虎丘寺不知方伯望征帆

韦苏州集卷四

卷五

钦定四库全书

韦苏州集卷五

唐 韦应物 撰

酬答

期卢嵩枉书称日暮无马不赴以诗答

佳期不可失终愿枉衡门南陌人犹度西林日未昏庭前空倚杖花里独留罇莫道无来驾知君有短辕

任洛阳丞答前长安田少府问

相逢且对酒相问欲何如数岁犹卑吏家人笑着书告归应【一作今】未得荣宦又知疎
日生春草空令忆旧居假中枉卢二十二书示称卧疾兼讶李二久不访问以诗答书因以戏李二

微官何事劳趋走服药闲眠养不才花里碁盘憎鸟污枕边书卷讶风开故人问讯缘同病芳月相思阻一盃应笑王戎成俗物遥持尘尾独徘徊

酬卢嵩秋夜见寄五韵

乔木生夜凉月华满前墀去君咫尺地劳君千里【一作万】思素秉栖遁志况贻招隐诗坐见林木荣【一云坐损经济策】愿赴沧洲期何能待岁晏携手当此时

酬郑户曹骊山感怀

苍山何郁盘飞阁凌上清先帝昔好道下元朝百灵白云已萧条麋鹿但纵横泉水今尚暖旧林亦青青我念绮襦岁扈从当太平小臣职前驱驰道出灊亭翩翩日月旗殷殷鼙鼓声万马自腾骧八骏按轡行日出烟峽绿氛氲丽层甍登临起遐想沐浴懽圣情朝燕咏无事时丰贺国祲日和弦管音下使万室听海内凑朝贡贤愚共欢荣合沓车马喧西闻长安城事往世如寄感深迹所经申章报兰藻一望双涕零

答李瀚三首

孤客逢春暮 緘情寄旧游
海隅人使远 书到洛阳秋
马卿犹有壁 渔父自无家
想子今何处 扁舟隐荻花
林中观易罢 溪上对鸥闲
楚俗饶辞客 何人最往还
酬柳郎中春日归扬州南郭见别之作

广陵三月花正开花里 逢君醉一回
南北相过殊不远 暮潮从去早潮来

酬豆卢仓曹题库壁见示

掾局劳才子 新诗动洛川
运筹知决胜 聚米似论边
宴罢常分骑 晨趋又比肩
莫嗟年鬓改 郎署定推先

酬李儋

开门临广陌 旭旦车驾喧
不见同心友 徘徊忧且烦
都城二十里 居在艮与坤
人生所各务 乖阔累朝昏
湛湛罇中酒 青青芳树园
緘情未及发 先此枉璵璠
迈世超【一作蹶】高躅 寻流得真源
明当策疲马 与子同笑言

酬元伟过洛阳夜燕

三载寄关东 所懽皆远违
思怀方耿耿 忽得覩容辉
亲燕在良夜 欢携辟中闱
问我犹杜门 不能奋高飞
明灯照四隅 炎炭正可依
清觴虽云酌 所媿乏珍肥
晨装复当行 寥落星已稀
何以慰心曲 伫子西还归

酬韩质舟行阻冻

晨坐枉嘉藻 持此慰寝兴
中获辛苦奏 长河结陰冰
皓曜羣玉发 凄清孤景凝
【一作澄】至柔反成坚
造化安可恒 方舟未得行
凿饮空兢兢 苦寒弥时节
待泮岂所能 何必涉广川
荒衢且升腾 殷勤宣中意
庶用达吾朋 李博士弟以余罢官居同德精舍共有伊陆名山之期久而未去枉诗见问中云宋生昔登览末云每能顾蓬荜直书鄙怀聊以为答

初夏息衆缘 双林对禅客
枉兹芳兰藻 促我幽人策
冥搜企前哲 逸句陈往迹
髣髴陆浑南 迢递千峯碧
从来迟高驾 自顾无物役
山水心所娱 如何更朝夕
晨兴涉清洛 访子高阳宅
莫言往来疎 驾马知阡陌

寄酬李博士永宁主簿叔厅见待

解鞍先几日 欵曲见新诗
定向公堂醉 遥怜独去时
叶沾寒雨落 钟度远山迟
晨策已云整 下同林下期
答令狐士曹独孤兵曹联骑暮归望山见寄

共爱青山住近南行牵吏役背双骖枉书独宿对流水遥羨归时满夕岚

答李博士

休沐去人远高斋出林杪晴山多碧峯颢气凝秋晓端居喜良友枉使千里路缄书当夏时开缄时已度檐鸂已飏扬荷露方萧飒梦远竹窗幽行稀兰径合旧居共南北往来只如昨问君今为谁日夕度清洛

答刘西曹【时为京兆功曹】

公馆夜云寂微凉羣树秋西曹得时彦华月共淹留长啸举清觴志气谁与俦千龄事虽邈俯念忽已周篇翰如云兴京洛颇优游论文不独占理妙即同流浅劣见推许恐为识者尤空慙文璧赠日夕不能酬【夕一作仄】

答贡士黎逢【时任京兆功曹】

茂等【一作才】方上达诸生安可希栖神澹物表涣汗布令词如彼崑山玉本自有光辉鄙人徒区区称叹亦何为弥月旷不接公门但【一作役】驱驰兰章忽有赠持用慰所思不见心尚密【一作微密】况当相见时

答韩库部协

良玉表贞度丽藻颇为工名列金闺籍心与素士同日晏下朝来车马自生风清宵有佳兴皓月直南宫矫翮方上征顾我邈忡忡岂不愿攀举执事府庭中智乖时亦蹇才大命有【一作为】通还当以道推解组守蒿蓬

答崔主簿倬

朗月分林霭遥管动离声故驩良已徂空宇澹无情窈窕云鴈没苍茫河汉横兰章不可答冲襟徒自盈

答徐秀才

鉛钝谢贞器时秀猥见称岂如白玉仙【一作仙山鹤】方与紫霞升清诗舞艳雪孤抱莹玄冰一枝非所贵怀书思武陵

答东林道士

紫阁西边第几峯茅斋夜雪虎行踪遥看黛色知何处欲出山门寻暮钟【一作欲向西山寻】

暮钟】

答长宁令杨辙

皓月升林表公堂满清辉嘉宾自远至觴饮夜何其宰邑视京县归来无寸资瓌文溢衆宝雅正得吾师广川含澄澜茂【一作芳】树擢华滋短才何足数枉赠媿妍词欢眄良见属素怀亦已披何意云栖翰不嫌蓬艾卑但恐河汉没回车首路歧

答冯鲁秀才

晨坐枉琼藻知子返中林澹然山景晏泉谷响幽禽髣髴谢尘迹逍遥舒道心顾我腰间绶端为华髮侵簿书劳应对篇翰旷不寻薄田失鋤耨生苗安可任徒令慙所问想望东山岑

答崔主簿问兼简温上人

缘情生衆累晚悟依道流诸境一已寂了将身世浮闲居澹无味忽复四时周靡靡芳草积稍稍新篁抽即此抱余素块然诚寡俦自适一忻意愧蒙君子忧

清都观答幼遐

逍遥仙家子日夕朝玉皇兴高清露没渴饮琼华浆解组一来欵披衣拂天香粲然顾我笑緑简发新章泠泠如玉音【一作响】馥馥若兰芳浩意坐盈此月华殊未央却念諠譁日何由得清凉疎松抗【一作枕】高殿密竹陰长廊荣名等粪土携手随风翔

善福精舍答韩司録清都观会宴见忆

弱志厌衆纷抱素寄精庐皦皦仰时彦闷闷【平声】独为愚之子亦辞秩高踪罢驰驱忽因西飞禽赠我以琼琚始表仙都集复言欢乐殊人生各有因契阔不获俱一来田野中日与人事疎水木澄秋景逍遥清赏余枉驾怀前诺引领岂斯须【一作须臾】无为便高翔邈矣不可迂

答长安丞裴说

出身忝时士於世本无机爰以林壑趣遂成顽钝姿临流意已凄采菊露未稀举头见秋山万事都若遗独践幽人踪邈将亲友违髦士佐京邑怀念枉贞词久雨积幽抱清罇宴良知从容操剧务文翰方见推安能戢羽翼顾此林栖时

奉酬处士叔见示

挂纓守貧賤積雪卧郊園叔父降趾壺觴携到門高齋樂燕罷清夜道心存即此同疎氏可以一忘言

答庫部韓郎中

高士不羈世頗將榮辱齊適委華冕去欲還幽林栖雖懷承明戀忻與物累睽逍遙觀運流誰復識端倪而我豈高【一作能】致偃息平門西愚者世所遺沮溺共耕犁風雪積深夜園田掩荒蹊幸蒙相思札欸曲期見携

答暢校書當

偶然棄官去投迹在田中日出照茅屋園林【一作種園】養愚蒙雖云无一資罇酌會不空且忻百谷成仰叹造化功出入與民伍作事靡不同時伐南澗竹夜還泮水東貧蹇自成退豈為高人踪覽君金玉篇彩色發我容【一作蒙】日日欲為報方【一作歷】春已徂冬

答崔都水

深夜竹庭雪孤燈案上書不遇無為化【一作法】誰復得門居

酬令狐司錄善福精舍見贈

野寺望山雪空齋對竹林我以養愚地生君道者心

泮上精舍答趙氏外甥伉

遠迹出塵表寓身雙樹林如何小子伉【一作弟】亦有超世心担書從我游携手廣川陰云開夏郊綠景晏青山沉對榻遇清夜獻詩合【一作全】雅音所推苟禮數於性道豈深隱拙在冲默經世昧古今無為率爾言可以致華簪

答趙氏甥伉

暫與雲林別忽陪鴛鷺翔看山不得去知爾獨相望

答端

郊園夏雨歇閑院綠陰生職事方無効幽賞獨違情物色坐如見離抱悵多盈況感夕涼氣聞此亂蟬鳴答史館張學士同柳庶子學士集賢院看花見寄兼呈柳學士

班揚秉文史對院自為隣余香掩閣去遲日看花頻似雪飄闥闔從風點近臣南宮有芳樹不

并禁垣春

答王郎中

卧合枉芳藻览旨怅秋晨守郡犹羈寓无以慰嘉宾野旷归云尽天清晓露新池荷凉已至
梧落渐频风物殊京国邑里但荒榛赋繁属军兴政拙媿斯人髦士久台阁中路一漂沦归当
列盛朝【一作明】岂念卧淮滨

答崔都水

亭亭心中人迢迢居秦关常緘素札去【一作问】适枉华章还忆在沔郊时携手望秋山久
嫌官府劳初喜罢秩闲终年不事业寝食长慵顽不知为时来【一作何为来】名籍挂郎间
摄衣辞田里华簪耀颓颜卜居又依仁日夕正追攀牧人本无术命至苟复迁离念积岁序归
途眇山川郡斋有佳月园林含清泉同心不在宴罇酒徒盈前览君陈迹游词意俱凄妍忽忽
已终日将酬不能宣毗税况重叠公门极熬煎责逋甘首免【一作退】岁晏当归田勿厌守
穷辙【一作勿厌守穷贱】慎为名所牵

答王卿送别

去马嘶春草归人立夕阳元知数日别要使两情伤

答裴丞说归京所献

执事颇勤久行去亦伤乖家贫无僮仆吏卒升寝斋衣服藏内篋药草曝前阶谁复知次第
落且安排还期在岁晏何以慰吾怀

答裴处士

遗民爱精舍乘犊入青山来署高阳里不遇白衣还礼贤方化俗闻风自款关况子逸羣士栖
息蓬蒿间

答杨奉礼

多病守山郡自得接嘉宾不见三四日旷若十余旬临觴独无味对榻已生尘一咏舟中作洒
雪忽惊新烟波见栖旅景物具昭陈秋塘唯落叶野寺不逢人白事廷吏简闲居文墨亲高天
池阁静寒菊霜露频应当整孤棹归来展殷勤

答端

坐忆故园人已老宁知远郡鴈还来长瞻西北是归路独上城楼日几回

答僊奴重阳二甥【僊奴赵氏甥伉重阳崔氏甥播】

弃职曾守拙翫幽遂忘喧山涧依磽壅竹树?清源贫居烟火湿【一作絶】岁熟梨枣繁风雨
飘茅屋蒿草没瓜园羣属相欢悦不觉过朝昏有时看禾黍落日上秋原饮酒任真性挥笔肆
狂言一朝忝兰省三载居远藩复与诸弟子篇翰每相敦西园休习射南池对芳罇山药【一
作茵】经雨碧海榴凌霜翻念尔不同此怅然复一论重阳守故家僊子旅湘沅俱有殫中藻
恻恻动离魂不知何日见衣上泪空存

答重阳

省札陈往事怆忆数年中一身朝北阙家累守田农望山亦临水暇日每来同性情一疎散园
林多清风忽复隔淮海梦想在沔东病来经时节起见秋塘空城郭连榛岭鸟雀噪沟丛坐使
惊霜鬓撩乱已如蓬

顾十二左迁过韦苏州房杭州韦睦州三使君皆有郡中燕集诗辞章高丽鄙夫之所仰慕顾
生既至留连笑语因亦成篇以继三君子之风焉【附】信州刺史刘太真上

宠至乃不惊罪及非无由奔迸历畏途缅邈赴偏【一作荒】陬牧此雕弊毗属当赋敛秋夙
兴谅无补旬暇焉敢休前日怀友生独登城上楼迢迢西北望远思不可收今日车骑来旷然
销人忧晨迎东斋饭晚度南溪游以我碧流水泊君青翰舟莫将迁客程不为胜景留飞札谢
三守斯篇希见酬

酬刘侍郎使君

琼树凌霜雪葱蒨如芳春英贤虽出守本是玉阶人宿昔陪郎署出入仰清尘孰云俱列郡比
德岂为邻风雨飘海气清凉悦心神重门深夏尽赋诗延衆宾方以岁月旧每蒙君子亲继作
郡斋什远赠荆山珍高闲【一作山城】庶务理游眺景物新朋友亦远集燕酌在佳辰始唱
已慙拙将酬益难伸濡毫意僂俛一用写悃勤

硤州旅舍奉怀苏州韦郎中【公频有尺书颇积离乡之思附】令狐岨上

儒服学从政遂为尘事婴衔命东复西孰堪异乡情怀禄且怀恩策名敢逃名美彼农亩人白
首亲友并江山入秋气草木雕晚荣方塘寒露凝旅馆凉飈生懿交守东吴梦想闻颂声云水
方浩浩离忧何时平答令狐侍郎

一凶乃一吉一是复一非孰能逃斯理亮在识其微三黜故无愠高贤当庶几但以亲交恋音
容邈难希况惜别离久俱忻藩守归朝宴方陪厠山川又乖违吴门冒海雾峡路凌连碕同会

在京国相望涕沾衣明时重英才当复列彤闱白玉虽尘垢拂拭还光辉

酬张协律

昔人鬻春地今人复一贤属余藩守日方君卧病年丽思阻文【一作交】宴芳踪阙宾筵经时岂不怀欲往事屡牵公府适烦倦开缄莹新篇非将握中宝何以比其妍感兹栖寓词想复痾瘵纒空宇风霜交幽居情思绵当以贫非病孰云白未玄邑中有其人憔悴即我愆由来牧守重英俊得荐延匪人等鸿毛斯道何由宣遭时无早晚蘊器俟良缘观文心未衰勿药疾当痊【一云勿药当自痊】晨期简牍罢驰慰子忉然

即事奉呈郎中使君

【附】东海钓客试秘书省校书郎秦系

久卧云间已息机青袍忽着狎鸥飞诗兴到来无一事郡中今有谢玄晖

答秦十四校书

知掩山扉三十秋鱼须翠碧弃牀头莫道谢公方在郡五言今日为君休

答宾

斜月才鉴帷凝霜偏冷枕持情须耿耿故作单牀寝答郑骑曹青橘絶句【一作故人重九日求橘书中戏赠】

怜君卧病思新橘试摘犹酸亦未黄书後欲题三百颗洞庭须待满林霜

奉和圣制重阳日赐宴

圣心忧万国端居在穆清玄功致海晏锡讌表文明恩属重阳节雨应此时晴寒菊生池苑高树出宫城捧藻千官处垂戒百王程复覩开元日臣愚献颂声

和吴舍人早春归沐西亭言志

晓漏戒中禁清香肃朝衣一门双掌诰伯侍仲言归【一作伯仲待言归】亭高性情旷职密交游稀赋诗乐无事解带偃南扉阳春美时泽旭霁望山晖幽禽响未转【一作好鸟幽未转】东原緑犹微名虽列仙爵心已遣【一作遗】尘机即事同岩隐圣渥良难违

奉和张大夫戏示青山郎

天生逸世姿竹马不曾骑
览卷冰将释援毫露欲垂
金貂传几叶玉树长新枝
荣禄何妨早甘罗亦小儿

答河南李士巽题香山寺

洛都游宦日少年携手行
投杯起芳席揔轡振华缨
关塞有佳气岩开伊水清
攀林憩佛寺登高望都城
蹉跎二十载世务各所营
兹赏长在梦故人安得并
前岁守九江恩召赴咸京
因涂再登历山河属晴明
寂寞僧侣少苍茫林木成
墙宇或崩剥不见旧题名
旧游况存歿独此泪交横
交横谁与同书壁贻友生
今兹守吴郡绵思方未平
子复经陈迹一感我深情
远蒙惻怆篇中有金玉声
反覆终难答金玉尚为轻

答故人见谕

素寡名利心自非周圆器
徒以岁月资屡蒙藩条寄
时风重书札物情敦货遗
机杼十缣单慵疎百函愧
常交亲责且为一官累况
本濩落人归无置锥地省
已已知非枉书见深致虽
欲効区区何由枉其志

酬阎员外陟

寒夜阻良觌丛竹想幽居
虎符予已误金丹子何如
醺集观农暇笙歌听讼余
虽蒙一言教自愧道情疎
逢遇

长安遇冯着

客从东方来衣上灞陵雨
问客何为来【一作来何为】
采山因买斧冥冥花正开
【一作满】扬扬薷新乳
昨别今已春鬓丝生几缕

将发楚州经宝应县访李二忽於州馆相遇月夜书事因简李宝应

孤舟欲夜发祗为访情人
此地忽相遇留连意更新
停杯嗟别久对月言家贫
一问临邛令如何待上宾

广陵遇孟九云卿

雄藩本帝都游士多俊贤
夹河树郁郁华馆十里连
新知虽满堂中意颇未宣
忽逢翰林友欢乐斗酒前
高文激颓波四海靡不传
西施且一笑衆女安得妍
明月满淮海哀鸿逝长天
所念京国远我来君欲
【一作独】还【一作又旋】

淮上遇洛阳李主簿

结茅临古渡卧见长淮流
窻里人将老门前树已秋
寒山独过鴈暮雨远来舟
日夕逢归客每能忘旧游
路逢崔元二侍御避马见招以诗戏赠

一台称二妙归路望行尘
俱是攀龙客空为避马人
见招翻局蹠相问良殷勤
日日吟趋府弹冠岂有因

逢杨开府

少事武皇帝无赖恃恩私
身作里中横家藏亡命儿
朝持【一作枰一作拆】樗蒲局暮窃东邻姬
司隶不敢捕立在【一作登】白玉墀
骊山风雪夜长杨羽猎时
一字都不识饮酒肆顽痴
武皇升仙去憔悴被人欺
读书事已晚把笔学题诗
两府始收迹南宫谬见推
非才果不容出守抚 嫠忽逢杨开府
论旧涕俱垂坐客何由识
唯有故人知

休假日访王侍御不遇【一本访李廓】

九日驱驰一日闲寻君不遇又空还
怪来诗思清人骨门对寒流雪满山

因省风俗访道士侄不见题壁

去年涧水今不流去年杏花今又拆
山人归来问是谁还是去年行春客

韦苏州集卷五

卷六

钦定四库全书

韦苏州集卷六

唐 韦应物 撰

怀思

有所思

借问堤上柳青青为谁春空游昨日地不见昨日人
缭绕万家井往来车马尘莫道无相识要非心所亲

暮相思

朝出自不还暮归花尽发岂无终日会惜此花间月空馆忽相思微钟坐来歇【来或作未】

夏夜忆卢嵩

霭霭高馆暮开轩淅烦襟不知湘雨来潇洒在幽林【一云不知微萧洒山鸟鸣幽林】炎月得凉夜芳罇谁与斟
故人南北居累月间徽音人生无闲日欢会当在今反侧候天旦层城苦沉沉

春思

野花如雪绕江城坐见年芳忆帝京闾阖晓开凝碧树曾陪鸳鹭听流鶯

春中忆元二

雨歇万井春柔条已含绿徘徊洛阳陌惆怅杜陵曲游丝正高下啼鸟还断续有酒今不同思君莹如玉

怀素友子西

广陌并游骑公堂接华襟方欢遽见别永日独沉吟阶暝流暗驶气疎露已侵层城湛深夜片月生幽林
往款良未遂来覩无音恒当清觞宴思子玉山岑耿耿何以写密言空委心

对韩少尹所赠砚有怀

故人谪遐远留砚宠斯文
白水浮香墨清池满夏云
念离心已永感物思徒纷
未有桂阳使裁书一报君

月晦忆去年与亲友曲水游讌

晦赏念前岁京国结良俦
骑出宣平里饮对曲池流
今朝隔天末空园伤独游
雨歇林光变塘绿鸟声幽
凋忙积逋税华鬓集新秋
谁言恋虎符终当还旧丘

清明日忆诸弟

冷食方多病开襟一忻然
终令思故郡烟火满晴川
杏粥犹堪食榆羹已稍煎
唯恨乖亲燕坐度此芳年

池上怀王卿

幽居捐世事佳雨散园芳
入门霭已绿水禽鸣春塘
重云始成夕忽霁尚残阳
轻舟因风泛郡阁望苍苍
私燕阻外好临欢一停觴
兹游无时尽旭日愿相将

立夏日忆京师诸弟

改序念芳辰烦襟倦日永
夏木已成阴公门昼恒静
长风始飘阁叠云才吐岭
坐想离居人还当惜徂景
【一作光景】

晓至园中忆诸弟崔都水

山郭恒悄悄林月亦娟娟
景清神已澄【一作谧】
事简虑绝牵秋塘徧衰草
晓露洗红莲不见心所爱
兹赏岂为妍

怀琅琊深标二释子

白云埋大壑阴崖滴夜泉
应居西石室月照山苍然

雨夜感怀

微雨洒高林尘埃自萧散
耿耿心未平沉沉夜方半
独惊长簟冷遽觉愁鬓换
谁能当此夕不有盈襟叹

云阳馆怀谷口

清泚阶下流云自谷口源念昔白衣士结庐在石门道高杳无累景静得忘言山夕綠陰滿世移清赏存吏役岂遑暇幽怀复朝昏云泉非所濯萝月不可援长往遂真性暂游恨卑喧出身既事世高躅难等论

忆沔上幽居

一来当复去犹此厌樊笼况我林栖子朝服坐南宫唯独问啼鸟还如沔水东

重九登滁城楼忆前岁九日归沔上赴崔都水及诸弟讌集凄然怀旧

今日重九讌去岁在京师聊回出省步一赴郊园期嘉节始云迈周辰已及兹秋山满清景当赏属乖离凋散民里阔摧翳衆木衰楼中一长啸恻怆起凉飈

始夏南园思旧里

夏首云物变雨余草木繁池荷初帖水林花已扫园紫丛蝶尚乱依阁鸟犹喧对此残芳月忆在汉陵原发蒲塘驿缘路见泉谷村墅忽想京师旧居追怀昔年

青山导骑遶春风行旆舒均徭视属城问疾躬里闾烟水依泉谷川陆散樵渔忽念故园日复忆骊山居荏苒班鬓及梦寝?宦初不觉平生事咄嗟二纪余存没阔已永悲多欢自疎高秩非为美阑干泪盈裾

行旅

经函谷关

洪河絶山根单轨出其侧万古为要枢往来何时息秦皇既恃险海内被吞食及嗣同覆顛咽喉莫能塞炎灵诟西驾娄子非经国徒欲扼诸侯不知恢至德圣朝及天宝豺虎起东北下沉战死魂上结穷冤色古今虽共守成败良可识藩屏无俊贤金汤独何力驻车一登眺感慨中自恻

经武功旧宅

兹邑昔所游嘉会常在目历载俄二九始往今来复戚戚居人少茫茫野田綠风雨经旧墟毁垣迷往躅門临川流驶树有羈雌宿多累恒悲往长年觉时速欲去中复留徘徊结心曲【徘徊一作彷徨】

往云门郊居涂经回流作

兹晨乃休暇适往田家庐原谷经涂澁春阳草木敷才遵板桥曲复此清涧纡崩壑方见射回流忽已舒明灭泛孤景杳霭含夕虚无将为邑志一酌澄波余

乘月过西郊渡

远山含紫氛春野霭云暮值此归时月留连西涧渡谬当文墨会得与羣英遇赏逐乱流翻心将清景悟行车俨未转芳草空盈步已举候亭火犹爱村原树还当守故局恨恨乘幽素

晚归泮川

凌雾朝闾阖落日返清川簪组方暂解临水一翛然昆弟忻来集童稚满眼前适意在无事携手望秋田南岭横爽气高林绕遥阡野庐不锄理翳翳起荒烟名秩斯逾分廉退媿不全已想平门路晨骑复言旋

授衣还田里

公门悬甲令澣濯遂其私晨起怀怆恨野田寒露时气收天地广风凄草木衰山明始重叠川浅更逶迤烟火生闾里禾黍积东菑终然可乐业时节一来斯

夕次盱眙县

落帆逗【一作透】淮镇停舫临孤驿浩浩风起波冥冥日沉夕人归山郭暗鴈下芦洲白独夜忆秦关听钟未眠客

春月观省属城始憩东西林精舍

因时省风俗布惠迨高年建隼出浔阳整驾游山川白云歛晴壑羣峯列遥天嶽崎石门状杳霭香炉烟榛荒屢?罍偏侧殆覆顛方臻释氏庐时物屡华妍昙远昔经始於兹閤幽玄东西竹林寺灌注寒涧泉人事既云泯岁月复已绵殿宇余丹紺磴阁峭欹悬佳士亦栖息善身絶尘缘今我蒙朝寄教化敷里鄣道妙苟为得出处理无偏心当同所尚迹岂辞纒牵

自蒲塘驿回驾经历山水

馆宿风雨滞始晴行盖转浔阳山水多草木俱纷衍崎岖缘碧涧苍翠践苔蘚高树夹潺湲崩石横陰巘野杏依寒拆余云冒岚浅性慳形岂劳境殊路遗缅忆昔终南下佳游亦屡展时禽下流暮纷思何由遣

山行积雨归涂始霁

揽辔穷登降陰雨遘二旬但见白云合不睹岩中春急涧岂易揭峻涂良难遵深林猿声冷沮洳虎迹新始霁升阳景山水阅清晨杂花积如雾百卉萋已陈鸣驺屡骧首归路自忻忻

感叹

伤逝【此後叹逝哀伤十九首尽同德精舍旧居伤怀时所作】

染白一为黑焚木尽成灰念我室中人逝去亦不回结发二十载宾敬如始来提携属时屯契阔忧患灾柔素亮为表礼章夙所该仕公不及私百事委令才一旦入闺门四屋满尘埃斯人既已矣触物但伤摧单居移时节泣涕抚婴孩知妄谓当遣临感要难裁梦想忽如睹惊起复徘徊此心良无已遶屋生蒿莱

往富平伤怀

晨起凌严霜恸哭临素帷驾言百里涂惻怆复何为昨者仕公府属城常载驰出门无所忧返室亦熙熙今者掩筠扉但闻童稚悲丈夫须出入顾尔内无依衔恨已酸骨何况苦寒时单车路萧条回首长逶迟飘风忽截野嘹唳鴈起飞昔时同往路独往今讵知

出还

昔出喜还家今还独伤意入室掩无光衔哀写虚位凄凄动幽幔寂寂惊寒吹幼女复何知时来庭下戏咨嗟日复老错莫身如寄家人劝我食对案空垂泪

冬夜

杳杳日云夕郁结谁为开单衾自不暖霜霰已皑皑晚岁沦夙志惊鸿感深哀深哀当何为桃李忽凋摧帟帐徒自设冥冥岂复来平生虽恩重迁去托穷埃抱此女曹恨顾非高世才振衣中夜起河汉尚徘徊

送终

奄忽踰时节日月获其良萧萧车马悲祖载发中堂生平同此居一旦异存亡斯须亦何益终复委山冈行出国南门南望郁苍苍日入乃云造恸哭宿风霜晨迁俯玄庐临诀但遑遑方当永潜翳仰视白日光俯仰遽终毕封树已荒凉独留不得还欲去结中肠童稚知所失啼号捉我裳即事犹仓卒岁月始难忘

除日

思怀耿如昨季月已云暮忽惊年复新独恨人成故冰池始泮绿梅援【一作梢】还飘素淑
景方转延朝朝自难度

对芳树

迢迢芳园树列映清池曲对此伤人心还如故时绿风条洒余霭露叶承新旭佳人不再攀下
有往来躅

月夜

皓月流春城华露积芳草坐念绮窗空翻伤清景好清景终若斯伤多人自老

叹杨花

空蒙不自定况值暄风度旧赏逐流年新愁忽盈素才萦下苑曲稍满东城路人意有悲欢时
芳独如故

过昭国里故第

不复见故人一来过故宅物变知景暄心伤觉时寂池荒野筠合庭绿幽草积风散花意谢鸟
还【一作啼】山光夕宿昔方同赏讵知今念昔絨室在东厢遗器不忍覩柔翰全分意芳巾
尚染泽残工委筐篋余素经刀尺收此还我家将还复愁惕永绝携手欢空存旧行迹冥冥独
无语杳杳将何适唯思今古同时缓伤与戚

夏日

已谓心苦伤如何日方永无人不昼寝独坐山中静悟澹将遣虑学空庶遗境积俗易为侵愁
来复难整

端居感怀

沉沉积素抱婉婉属之子永日独无言忽惊振衣起方如在帟室复悟永终已稚子伤恩绝盛
时若流水暄凉同寡趣朗晦俱无理寂性常喻人滞情今在已空房欲云暮巢鷺亦来止夏木
遽成阴绿苔谁复履感至竟何方幽独长如此

悲纨扇

非关秋节至讵是恩情改掩嚬人已无委篋凉空在何言永不发暗使销光彩

闲斋对雨

幽独自盈抱陰淡亦连朝空斋对高树疎雨共萧条巢鷺翻泥湿蕙花依砌消端居念往事倏忽若惊飈

林园晚霁

雨歇见青山落日照林园山多【一作夕】烟鸟乱林清风景翻提携唯子弟萧散在琴言同游不同意耿耿独伤魂寂寞钟已尽如何还入门

秋夜二首

庭树转萧萧陰虫还戚戚独向高斋眠夜闻寒雨滴微风时动牖残灯尚留壁惆怅平生怀偏来委今夕霜露已凄漫星汉复昭回朔风中夜起惊鸿千里来萧条凉叶下寂寞清砧哀岁晏仰空宇心事若寒灰

感梦

岁月转芜漫形影长寂寥髣髴微梦感叹起中宵绵思霭流月惊魂飒回飈谁念兹夕永坐令顏鬓凋

同德精舍旧居伤怀

洛京十载别东林访旧扉山河不可望存歿意多违时迁迹尚在同去独来归还见窗中鸽日暮遶庭飞

悲故交

白璧衆求瑕素丝易成污万里顛沛还高堂已长暮积愤方盈抱纏哀忽逾度念子从此终黄泉竟谁诉一为时事感岂独平生故唯见荒丘原野草涂朝露

张彭州前与缙氏冯少府各惠寄一篇多故未答张已云没因追哀叙事兼远简冯生

君昔掌文翰西垣复石渠朱衣乘白马辉光照里闾余时忝南省接讌媿空虚一别守兹郡蹉跎岁再除长怀关河表永日简牋余郡中有方塘凉阁对红蕖金玉蒙远贶篇咏见吹嘘未答平生意已没九原居秋风吹寝门长恸涕涟如覆视緘中字奄为昔人书发鬓已云白交友日彫疎冯生远同恨憔悴在田庐

东林精舍见故殿中郑侍御题诗追旧书情涕泗横集因寄呈阎澧州冯少府

仲月景气佳东林一登历中有故人诗凄凉在高壁精思长悬【一作怀】世音容已归寂墨泽传洒余磨灭亲翰迹平生忽如梦百事皆成昔结骑京华年挥文篋笥积朝廷重英彦时辈分珪璧永谢柏梁陪独阙金门籍方婴存歿感岂暇林泉适雨余山景寒风散花光夕新知虽满堂故情谁能覩唯当同时友缄寄空凄戚

同李二过亡友郑子故第【李与之故非予所识】

客车名未灭没世恨应长斜月知何照幽林判自芳故人惊逝水寒雀噪空墙不是平生旧遗踪要可伤

话旧【亭中对兄姊话兰陵崇贤怀真已来故事泫然而作】

存亡三十载事过悉成空不惜沾衣泪并话一宵中

至开化里寿春公故宅

宁知府中吏故宅一徘徊历阶存往敬瞻位泣余哀废井没荒草陰牖生綠苔门前车马散非复昔时来

睢阳感怀

豺虎犯天纲昇平无内备长驱陰山卒略践三河地张侯本忠烈济世有深智坚壁梁宋间远筹吴楚利穷年方絶输邻援皆携贰使者哭其庭救兵终不至重围虽可越藩翰谅难弃饥喉待危巢悬命中路坠甘从锋刃毙莫夺坚贞志宿将降贼庭儒生独全义空城唯白骨同往无贱贵哀哉岂独今千载当歔歔

广德中洛阳作

生长太平日不知太平欢今还洛阳中感此方苦酸饮药本攻病毒肠翻自残王师涉河洛玉石俱不完时节屡迁斥山河长郁盘萧条孤烟絶日入空城寒蹇劣乏高步緝遗守微官西怀咸阳道踟躅心不安

阊门怀古

独鸟下高树遥知吴苑园凄凉千古事日暮倚阊门

感事

霜雪皎素丝何意坠墨池青苍犹可濯黑色不可移女工再三叹委弃当此时岁寒虽无褐机

杼谁肯施

感镜

铸镜广陵市菱花匣中发宿昔尝许人镜成人已没如冰结圆器类璧无丝发形影终不临清光殊不歇一感平生言松枝树秋月

叹白发

还同一叶落对此孤镜晓丝缕乍难分杨花复相遶时役人易衰吾年白犹少

韦苏州集卷六

卷七

<集部,别集类,汉至五代,韦苏州集>

钦定四库全书

韦苏州集卷七

唐 韦应物 撰

登眺

登高望洛城作一首

高台造云端遐瞰周四垠雄都定鼎地势据万国尊河岳出云雨土圭酌乾坤舟通【一作盈】南越贡城背北邙原帝宅夹清洛丹霞捧朝暾葱茏瑶台榭?篠双阙门十载构屯难兵戈若【一作久】云屯膏腴满榛芜比屋空毁垣圣主乃东眷俾贤拯元元熙熙居守化泛泛大府恩至损当【一作方】受益苦寒必生温平明四城开稍见市井喧坐感理乱迹永怀经济言吾生自不达空鸟何翩翻天高水流远日晏城郭昏徘徊讵旦夕聊用写忧烦

同德寺阁集眺

芳节欲云晏游遨乐相从高阁照丹霞飏飏含远风寂寥氛氲廓超忽神虑空旭日霁皇州迢崑见两宫嵩少多秀色羣山莫与崇三川浩东注瀍涧亦来同陰阳降太和宇宙得其中舟车满川陆四国靡不通旧堵今既葺庶甿亦已丰周览思自奋行当遇时邕

登宝意寺上方旧游【寺在武功曾居此寺】

翠岭香台出半天万家烟树满晴川诸僧近住不相识坐听微【一作岩】钟记往年

登乐游庙作

高原出东城郁郁见咸阳上有千载事乃自汉宣皇颓墉久凌迟陈迹翳丘荒春草虽复緑惊风但飘扬周览京城内双阙起中央微钟何处来暮色忽苍苍歌吹喧万井车马塞康庄昔人岂不尔百世同一伤【一作场】归当守冲漠迹寓心自忘

登西南冈卜居遇雨寻竹浪至泮壖萦带数里清流茂树云物可赏

登高创危构林表见川流微雨飒已至萧条川气秋下寻密竹尽忽旷沙际游纡直水分野绵

延稼盈畴寒花明废墟樵牧笑榛丘云水成【一作交】陰澹竹树更清幽适自恋佳赏【一作适自惬意赏又一作幽赏】复兹永日留

泮上与幼遐月夜登西冈翫花

置酒临高隅佳人自城阙已翫满川花还看满川月花月方浩然赏心何由歇

台上迟客

高台一悄望【一作聊望】远树间朝晖但见东西骑端令心赏违始霁郊园緑暮春啼鸟稀徒然对芳物何能独醉归

登楼

兹楼日登眺流岁暗蹉????坐厌淮南守秋山红树多

善福寺阁

残霞照高阁清山出远林晴明一登望潇洒此幽襟

楼中月夜

端令倚悬檻长望抱沉忧宁知故园月今夕在兹楼衰莲送余馥华露湛新秋坐见苍林变清辉怆已休【一作收】

寒食後北楼作

园林过新节风花乱高阁遥闻击鼓声蹴鞠军中乐

西楼

高阁一长望故园何日归烟尘拥【一作在】函谷秋鴈过来稀

夜望

南楼夜已寂暗鸟动林间不见城郭事沉沉唯四山

晚登郡阁

怅然高阁望已掩东城关春风偏送柳夜景欲沉山

登重玄寺阁

时暇陟云构晨霁澄景光始见吴都【一作郡】大十里郁苍苍山川表明丽湖海吞大荒合沓臻水陆骈阗会四方俗繁节又暄雨顺物亦康禽鱼各翔泳草木遍芬芳於兹省氓俗一用劝农桑诚知虎符忝但恨归路长游览

观早朝

伐鼓通严城车马溢广躔煌煌列明烛朝服照华鲜金门杳深沉尚听清漏传河汉忽已没司阁启晨关丹殿据龙首崔嵬对南山寒生千门里日照双阙间禁旅下成列鑪香起中天辉辉覩明圣济济行【音航】俊贤媿无鸳鹭姿短翮空飞还谁当假毛羽云路相追攀

陪元侍御春游

何处醉春风长安西复东不因俱罢职岂得此时同贯酒宣平里寻芳下苑中往来杨柳陌犹避昔年驄

游龙门香山泉

山水本自佳游人已忘虑碧泉更幽絶赏爱未【一作不】能去潺湲写幽磴缭绕带【一作对】嘉树激转忽殊流归泓又同注羽觞自成【一作伐】翫永日亦延趣灵草有时香仙【一作山】源不知处还当候圆月携手重游寓

龙门游眺

凿山导伊流中断若天辟都门遥相望佳气生朝夕素怀出尘意适有携手客精舍遶【一作寮】层阿千龕邻【一作鳞】峭壁缘云路犹缅憩涧钟已寂花树发烟华淙流散石脉长啸招远风临潭漱金碧日落望都城人间何役役【一作徘徊怅还驾城阙多物役】

洛都游寓

东风日已和元化亮无私草木同时植生条有高卑罢官守园庐岂不怀渴饥穷通非所干局促当何为佳辰幸可游亲友亦相追朝从华林宴暮返东城期掇英出兰皋翫月步川坻轩冕诚可慕所忧在縈维

再游龙门怀旧侣【尝与窦黄州洛阳韩丞湏池李丞密郑二尉同游】

两山郁相对晨策方上干霄霭眺都城悠悠俯清澜邈矣二三子兹焉屡游盘良时忽已周独往念前欢好鸟始云至衆芳亦未阑遇物岂殊昔慨伤自有端

庄严精舍游集

良游因时暇乃在西南隅緑烟凝层城丰草满通衢精舍何崇旷烦局一弘舒架虹施广?构云眺八区即此尘境远忽闻幽鸟殊新林【一作秋】泛景光丛緑含露濡永日亮难遂平生少欢娱谁能遽还归幸与【一作得】高士俱

府舍月游

官舍【一作寺】耿深夜佳月喜同游横河俱半落泛露忽惊秋散彩疎羣树分规澄素流心期与浩景苍苍殊未收

任鄠令洿陂游眺

野水灏长塘烟光乱晴日氤氲緑树多苍翠千山出游鱼时可见新荷尚未密屡往心独闲恨无理人术

西郊游瞩

东风散余洿陂水淡已緑【一本作渌】烟芳何处寻杳蔼春山曲新禽哢暄节晴光泛嘉木一与诸君游华觴忻见属

再游西郊渡

水曲一追游游人重怀恋婵娟昨夜月还向波中见惊禽栖不定流芳寒未徧携手更何时伫看花似霰

月溪与幼遐君贶同游【时二子还城】

岸筱覆回溪回溪曲如月沉沉水容緑寂寂流莺歇【一作鷯初歇】浅石方凌乱游禽时出没半雨夕阳霏缘源杂花发明晨重来此同心应已阙

与幼遐君贶兄弟同游白家竹潭

清赏非素期偶游方自得前登絶岭险下视深潭黑密竹已成暮归云殊未极春鸟依谷暄紫兰含幽色已将芳景遇复款平生忆终念一欢别临风还默默

秋夕西斋与僧神静游

晨登西斋望不觉至夕曛正当秋夏交原野起烟氛坐听凉飈举华月稍披云漠漠山犹隐灩
灩川始分物幽夜更殊境静兴弥臻息机非傲世于时乏嘉闻究空自为理况与释子羣

观田家

微雨衆卉新一雷惊蛰始田家几日闲耕种从此起丁壮俱在野场圃亦就理归来景常晏饮
犊西涧水饥飡不自苦膏泽且为喜仓廩无宿储徭役犹未已方慙不耕者禄食出闾里

园亭览物

积雨时物变夏緑满园新残花已落实高笋半成筠守此幽栖地自是忘机人

观泮水涨

夏雨万壑凑泮涨【一作流】暮浑浑草木盈川谷澶漫一平吞槎梗方弥泛涛沫亦洪翻北
来注泾渭所过无安源云岭同昏黑观望悸心魂舟人空敛棹风波正自奔

陪王卿郎中游南池

鵷鸿俱失侣同为此地游露浥荷花气风散柳园秋烟草凝衰屿星汉泛归流林高初上月塘
深未转舟清言屡往复华樽始献酬终忆秦川赏端坐起离忧

南园陪王卿游瞩

形迹虽拘检世事澹无心郡中多山水日夕听幽禽几阁文墨暇园林春景深杂花芳意散緑
池暮色沉君子有高躅相携在幽寻一酌何为贵可以写冲襟

游西山

时事方扰扰幽赏独悠悠弄泉朝涉涧采石夜归州挥翰题苍峭下马历嵌丘所爱唯山水到
此即淹留

春游南亭

川明气已变岩寒云尚拥南亭草心緑春塘泉脉动景煦听禽响雨余看柳重逍遥池馆华益
媿专城宠

再游西山

南谿古山郡信是高人居自叹乏弘量终朝亲簿书於时忽命驾秋野正萧疎积逋诚待责寻山亦有余测测石泉冷暖暖烟谷虚中有释门子种果【一作药】结茅庐出身厌名利遇境即踟躇守直虽多忤视险方晏如况将尘埃外襟抱从此舒

游灵岩寺

始入松路永独忻山寺幽不知临絶檻乃见西江流吴岫分烟景楚甸散林丘方悟关塞眇重轸故园愁闻钟戒归骑憩涧惜良游地疎泉谷狭春深草木稠兹焉赏未极清景【一作澹】期杪秋

与卢陟同游永定寺北池僧斋

密竹行已远子规啼更深緑池芳草气闲斋春树陰晴蹠飘兰迳游蜂遶花心不遇君携手谁复此幽寻

游溪

野水烟鹤唳楚天云雨空翫舟清景晚垂钓緑蒲中落花飘旅衣归流澹轻风缘源不可极远树但青葱

游开元精舍

夏衣始轻体游步爱僧居果园新雨後香台照日初緑陰生昼静【一作寂】孤花表春余符竹方为累形迹一来疎

襄武馆游眺

州民知礼让讼简得遨游高亭凭古地山川当暮秋是时秔稻熟西望尽田【一作平】畴仰恩慙政拙念劳喜岁收澹泊风景晏缭绕云树幽节往情恻恻天高思悠悠嘉宾幸云集芳罇始淹留还希习池赏【一作还喜曲池滨】聊以驻鸣驺

秋景诣琅琊精舍

屡访尘外迹未穷幽赏情高秋天景远始见山水清上陟岩殿憩暮看云壑平苍茫寒色起迢递晚钟鸣意有清夜恋身为符守婴悟言【一作方爱】缁衣子萧洒中林行

同韩郎中闲庭南望秋景

朝下抱余素地高心本闲如何趋府客罢秩见秋山疎树共寒意游禽同暮还因君悟清景西望一开顔

慈恩精舍南池作

清境岂云远炎氛忽如遗重门布緑陰菡萏满广池石发散清浅林光动涟漪缘崖摘紫房扣檻集灵龟涸涸余露气馥馥幽襟披积喧忻物旷耽翫觉景驰明晨复趋府幽赏当反思

雨夜宿清都观

灵飊动闾阖微雨洒瑶林复此新秋夜高阁正沉沉旷岁恨殊迹兹夕一披襟洞户含凉气网轩构层陰况自展良友芳樽遂盈斟适悟委前妄清言怡道心岂恋腰间绶如彼笼中禽

善福精舍秋夜迟诸君

广庭独闲步夜色方湛然丹阁已排云皓月更【一作正】高悬繁露降秋节苍林郁芊芊仰观天气凉高咏古人篇抚已亮无庸结交赖羣贤属予翹思时方子中夜眠相去隔城阙佳期屡徂迁【一作阻】如何日夕待见月三四圆

东郊

吏舍局终年出郊旷清曙杨柳散和风青山澹吾虑依丛适自憩缘涧还复去微雨霭芳原春鸠鸣何处乐幽心屡止遵事迹犹遽终罢斯【一作期】结庐慕陶真可庶

秋郊作

清露澄境远旭日照林初一望秋山净萧条形迹疎登原忻时稼采菊行故墟方愿沮溺耦淡泊守田庐

行寛禅师院

北望极长廊斜扉映【一作掩】丛竹亭午一来寻院幽僧亦独唯闻山鸟啼爱此林下宿

神静师院

青苔幽巷徧新林露气微经声在深竹高斋独掩扉憩树爱岚岭听禽悦朝晖方耽静中趣自与尘事违

精舍纳凉

山景寂已晦野寺变苍苍夕风吹高殿露叶散林光清钟始戒夜幽禽尚归翔谁复掩扉卧不咏南轩凉

蓝岭精舍

石壁精舍高排云聊直上佳游愜始愿忘险得前赏崖倾景方晦谷转川如掌緑林含萧条飞阁起弘敞道人上方至深夜还独往日落羣山陰天秋百泉响所嗟累已成安得长偃仰

道晏寺主院

北隣有幽竹潜筠穿我庐往来地既密心乐道者居残花回往节轻条?夏初闻钟北牕起啸傲永日余

义演法师西斋

结茅临絶岸隔水闻清磬山水旷萧条登临散情性稍指缘原骑还寻汲涧径长啸倚亭树怅然川光暝

澄秀上座院

繚绕西南隅鸟声转幽静秀公今不在独礼高僧影林下器未收何人适煮茗

至西峯兰若受田妇馈

攀崖复缘涧遂造幽人居鸟鸣泉谷暖土起萌甲舒聊登石楼憩下翫潭中鱼田妇有嘉献泼撒新岁余常恠投钱饮事与贤达疎今我何为答鰥寡欲焉如

昙智禅师院

高年不复出门径【一作援】衆草生时夏方新雨果药发余荣疎澹下林景流暮幽禽情身名两俱遣独此野寺行

起渡律师同居东斋院

释子喜相遇幽林俱避喧安居同僧夏清夜讽道言对阁景恒晏步庭陰始繁逍遥无一事松风入南轩

游琅琊山寺

受命恤人隐兹游久未遑鸣驺响幽涧【一作谷】前旌耀崇冈青冥台砌寒绿縟草木香填
壑跻花界叠石构云房经制随岩转缭绕岂定方新泉泄阴壁高萝?绿塘攀林一栖止饮水得
清凉物累诚可遣疲甿终未忘还归坐郡阁但见山苍苍

同越琅琊山【赵氏生辟强】

石门有雪无行迹松壑凝烟满众香余食施庭寒鸟下破衣挂树老僧亡

诣西山深师

曹溪旧弟子何缘住此山世有征战事心将流水闲扫林驱虎出宴坐一林间藩守宁为重拥
骑造云关

寻简寂观瀑布

蹑石欹危过急涧攀崖迢递弄悬泉犹将虎竹为身累欲付归人绝世缘

简寂观西涧瀑布下作

深【一作淙】流绝壁散虚烟翠涧深丛际松风起飘来洒尘襟窥萝翫猿鸟解组傲云林茶
果邀真侣觴酌洽同心旷岁怀兹赏行春始重寻聊将横吹曲一写山水音

游南斋

池上鸣佳禽僧斋日幽寂高林晚露清红药无人摘春水不生烟荒冈筠翳石不应朝夕游良
为蹉????客

南园

清露夏天晓荒园野气通水禽遥泛雪池莲迴披红幽林讵知暑环舟似不穷顿洒尘喧意长
啸满?风

西亭

亭宇丽朝景帘牖散暄风小山初构石珎树正然红弱藤已扶援幽兰欲成丛芳心幸如此佳
人时不同

夏景园庐

羣木昼陰静北牕凉气多闲居逾时节夏云已嵯峨
攀叶爱繁綠缘涧弄惊波岂为论夙志对此青山阿

夏至避暑北池

昼晷已云极宵漏自此长未及施政教所忧变炎凉
公门日多暇是月农稍忙高居念田里苦热安可当
亭午息羣物独游爱方塘门闭陰寂寂城高树苍苍
綠筠尚含粉圓荷始散芳於焉洒烦抱可以对华觴

题从侄成绪西林精舍书斋

栖身齿【一作始】多暮息心君独少慕谢始精文
依僧欲观妙洌泉前塔注清池北牕照果药杂芬敷
松筠疎蒨峭屡跻幽人境每肆芳辰眺采栗玄猿窟
擷芝丹林峤紵衣岂寒御蔬食非饥疗虽甘巷北单
【一作簞】岂塞青紫耀郡有优贤榻朝编贡士诏欲
同【一作求】朱轮载勿惮移文诮

题郑弘宪侍御遗爱寺草堂

居士近依僧青山结茅屋疎松映岚晚春池含苔綠
繁华冒阳岭新禽响幽谷长啸攀乔林慕兹高世躅

同元锡题琅琊寺

适从郡邑喧又兹三伏热山中清景多石罅寒泉洁
花香天界事松竹人间别殿分岚岭明磴临悬【一作玄】
壑絶昏旭穷陟降幽显尽披阅嶽【一作岭】骇风雨区
寒知龙蛇穴情虚澹泊生境寂尘妄灭经世岂非道无
为厌车辙【一作归轍】

题郑拾遗草堂

借地结茅栋横竹挂朝衣秋园雨中綠幽居尘事违
陰【一作凉】井夕虫乱高林霜果稀子有白云意构此
想岩扉

韦苏州集卷七

卷八

钦定四库全书

韦苏州集卷八

唐 韦应物 撰

杂兴

咏玉

乾坤有精物至宝无文章雕琢为世器真性一朝伤

咏露珠

秋荷一滴露清夜坠玄天将来玉盘上不定始知圆

咏水精

映物随颜色含空无表里持来向明月的皦愁成水

咏珊瑚

绦树无花叶非石亦非琼世人何处得蓬莱石上生

咏琉璃

有色同寒冰无物隔纖尘象筵看不见堪将对玉人

咏琥珀

曾为老茯神本是寒松液蚊蚋落其中千年犹可覩

咏晓

军中始吹角城上河初落深沉犹隐帷晃朗先分阁

咏夜

明从何处去暗从何处来但觉年年老半是此中催

咏声

万物自生听【一云万物自此听】太空恒寂寥还从【一作应】静中起却向静中消

任洛阳丞请告一首

方凿不受圆直木不为轮揆材各有用反性生苦辛折腰非吾事饮水非吾贫休告卧空馆养病絶嚣尘游鱼自成族野鸟亦有羣家园杜陵下千岁心氛氲天晴嵩山高雪後河洛春乔木犹未芳百草日已新着书复何为当去东臯耘

县斋

仲春时景好草木渐舒荣公门且无事微雨园林清泱泱水泉动忻忻衆鸟鸣闲斋始延瞩东作兴庶眈即事翫文墨抱冲披道经於焉日淡泊徒使芳樽盈

晚出府舍与独孤兵曹令狐士曹南寻朱雀街归里第

分曹幸同简联骑方惬素还从广陌归不觉青山暮翻翻鸟未没杳杳钟犹度寻草远无人望山多枉路聊参世士迹尝得静者顾出入虽见牵忘身缘所【一作明】晤

休暇东斋

由来束带士请谒无朝暮公暇及私身何能独闲步摘叶爱芳在扞竹怜粉污岸帻偃东斋夏天清晓露怀仙阅真诰贻友题幽素荣达颇知疎恬然自成度緑苔日已满幽寂谁来顾

夜直省中

河汉有秋意南宫生早凉玉漏殊杳杳云阙更苍苍华灯发新焰轻【一作炉】烟浮夕香顾迹知为忝束带愧周行

郡内闲居

栖息絶尘侣孱钝得自怡腰悬竹使符心与【一作如】庐山缙永日一酣寝起坐兀无思长廊独看雨衆药发幽姿今夕已云罢明晨复如斯何事能为累宠辱岂要辞

燕居即事

萧条竹林院风雨丛兰折幽鸟林上啼青苔人迹絶燕居日已永夏木纷成结几阁积羣书时来北牕阅

幽居

贵贱虽异等出门皆有营独无外物牵遂此幽居情微雨夜来过不知春草生青山忽已曙鸟雀绕舍鸣时与道人偶或随樵者行自当安蹇劣【一作拙】谁谓薄世荣

野居书情

世事日可见身名良蹉跎尚瞻白云岭聊作负薪歌

郊居言志

负暄衡门下望云归远山但要樽中物余事岂相关交无是非责且得任疎顽日夕临清涧逍遥思虑闲出去唯空屋弊簣委牕间何异林栖鸟恋此复来还世荣斯独已颓志【一作思】亦何攀唯当岁丰熟闾里一欢颜

夏景端居即事

北斋有凉气嘉树对层城重门永日掩清池夏云生遇此庭讼简始闻蝉初鸣逾怀故园怆默默以缄情

始至郡

湓城古雄郡【一作镇】横江千里驰高树上迢递峻堞绕欹危井邑烟火晚郊原草树滋洪流荡【一作薄】北址崇岭郁南圻斯民本乐生逃逝竟何为早岁属荒歉旧逋积如坻到郡方逾月终朝理乱丝宾朋未及醺简牘已云疲昔贤播高风得守媿无施岂待干戈戢且愿抚惇嫠

郡中西斋

似与尘境【一作世】絶萧条斋舍秋寒花独经雨山禽时到州清觴养真气玉书示道流岂将符守恋幸以栖心幽

新理西斋

方将毗讼理久翳西斋居草木无行次闲暇一芟除春阳土脉起膏泽发生初养条刊朽枿护药锄秽【一作荒】芜稍稍觉林笋历历忻竹疎始见庭宇旷顿令烦抱舒兹焉即可爱何必

是吾庐

晓坐西斋

??城鼓动稍稍林鷗去柳意不胜春岩光已知曙寝斋有单梯【一作茅】灵药为朝茹盥漱
忻景清焚香澄神虑公门自常事道心宁易【一作异】处

郡斋卧疾絶句

香炉宿火灭兰灯宵影微秋斋独卧病谁与覆寒衣

寓居永定精舍【苏州】

政拙忻罢守闲居初理生家贫何由往梦想在京城野寺霜露月农兴羁旅情聊租二顷田方
课子弟耕眼暗文字废身闲道心精即与人羣远岂谓是非婴

永定寺喜辟强夜至

子有新岁庆独此苦寒归夜叩竹林寺山行雪满衣深炉正然火空斋共掩扉还将一樽对无
言百事违

野居

结发屡辞秩立身本疎慢今得罢守归幸无世欲患栖止且偏僻嬉游无早晏逐兔上坡冈捕
鱼缘赤涧高歌意气在赏酒贫居惯时启北窗扉岂将文墨间

同褒子秋斋独宿

山月皎如烛风霜时动竹夜半鸟惊栖窗间人独宿

饵黄精

灵药出西山服食采其根九蒸换凡骨经着上世言候火起中夜馨香满南轩斋居感衆灵药
术启妙门自怀物外心岂与俗士论终期脱印绶永与天壤存

昭国里第听元老师弹琴

竹林高宇霜露清朱丝玉徽多故情暗识啼鸟与别鹤祗缘中有断肠声

野次听元昌奏横吹

立马莲塘吹横笛微风动柳生水波北人听罢泪将落南朝曲中怨更多

楼中阅清管

山阳遗韵在林端横吹惊响迴凭高阁曲怨绕秋城淅沥危叶振萧瑟凉气生始遇兹管赏已怀故园情

寒食

清明寒食好春园百卉开彩绳拂花去轻球度阁来长歌送落日缓吹逐残杯非关无烛罢良为羈思催

七夕

人世拘形迹别去间山川岂意灵仙偶相望亦弥年夕衣清露湿晨驾秋风前临懽定不住当为何所牵

九日

今朝把酒复惆怅忆在杜陵田舍时明年九日知何处世难还家未有期

秋夜

暗牕凉叶动秋天【一作斋】寝席单忧人半夜起明月在林端一与清景遇每忆平生欢如何方惻怆披衣露更【一作转】寒

秋夜一絕

高阁渐凝露凉叶稍飘闱忆在南宫直夜长钟漏稀

滁城对雪

晨起满闱雪忆朝闾阖时玉座分曙早金炉上烟迟飘散云台下凌乱桂树姿厠迹鸳鹭末蹈舞丰年期今朝覆山郡寂寞复何为

雪中

空堂岁已晏密室独安眠
压筱夜偏积覆阁晓逾妍
连山暗古郡惊风散一川
此时骑马出忽省京华年

咏春雪

徘徊轻雪意似借艳阳时
不悟风光冷翻令梅柳迟

对春雪

萧屑杉松声寂寥寒夜虑
州贫人吏稀雪满山城曙
春塘看幽谷栖禽愁未去
开闸正乱流宁辨花枝处

对残灯

独照碧牕久欲随寒烬灭
幽人将遽眠解带翻成结

对芳樽

对芳樽醉来百事何足论
遥见青山始一醒欲着接?还复昏

夜对流萤作

月暗竹亭幽萤光拂席流
还思故园夜更度一年秋
自惬观书兴何慙秉烛游
府中徒冉冉明发好归休

对新篁

新绿苞初解嫩气笋犹香
含露渐舒叶抽丛稍自长
清晨止亭下独爱此幽篁

夏花明

夏条绿已密朱萼缀明鲜
炎炎日正午灼灼火俱然
翻风适自乱照水复成妍
归视牕间字荧煌满眼前

对萱草

何人树萱草对此郡斋幽
本是忘忧物今夕【一作日】重生忧丛疎露始滴芳余蝶尚留
还思杜陵圃离披风雨秋

见紫荆花

杂英纷已积含芳独暮春还如故园树忽忆故园人

翫萤火

时节变衰草物色近新秋度月影才敛绕竹光复流

对杂花

朝红争景新【一作鲜】夕素含露翻妍姿如有意流芳复满园单栖守远郡永日掩重门不与花为偶终遣与谁言

种药

好读神农书多识药草名持缣购山客移蒔罗衆英不改幽涧色宛如此地生汲井既蒙泽插援亦扶倾陰颖夕房敛阳条夏花明悦翫从兹始日夕绕庭行州民自寡讼养闲非政成

西涧种柳

宰邑乖所愿僂俛愧昔人聊将休暇日种柳西涧滨置锺息微倦临流睇归云封壤自人力生条在阳春【一作王春】成陰岂自取为茂属佗辰延咏留佳赏山水变夕曛

种瓜

率性方卤莽理生尤自疎今年学种瓜园圃多荒芜衆草同雨露新苗独翳如直以春窘迫过时不得锄田家笑枉费日夕转空虚信非吾侪事且读古人书

喜园中茶生

洁性不可污为饮涤尘烦此物信灵味本自出山原聊因理郡余率尔植荒园喜随衆草长得与幽人言

移海榴

叶有苦寒色山中霜霰多虽此蒙阳景移根意如何

郡斋移杉

擢千方数尺幽姿已苍然结根西山寺来植郡斋前新含野露气稍静高牕眠虽为赏心遇岂有嵒中缘

花径

山花夹径幽古甃生苔澁胡床理事余玉琴承露湿朝与诗人赏夜携禅客入自是尘外踪无令吏趋急

慈恩寺南池秋荷咏

对殿含凉气裁规覆清沼衰红受露多余馥依人少萧萧远尘迹飒飒凌秋晓节谢客来稀回塘方独遶

题桐叶

参差剪绿绮潇洒覆琼柯忆在沔东寺偏书此叶多

题石桥

远学临海峤横此莓苔石郡斋三四峯如有灵仙【一作山】迹方愁暮云滑始照寒池碧自与幽人期逍遥竟朝夕

池上

郡中卧病久池上一来除榆柳飘枯叶风雨倒横查

滁州西涧

独怜幽【一作芳】草涧边生【一作行】上有黄鹂深树鸣春潮带雨晚来急野渡无人舟自横

西塞山

势从千里奔直入江中断岚横秋塞雄地束惊流满

山耕叟

萧萧垂白发默默讵知情独放寒林烧多寻虎迹行暮归何处宿来此空山耕

上方僧

见月出东山上 上方高处禅空林无宿火 独夜汲寒泉不下蓝溪寺 今年【一作来】三十年

烟际钟

隐隐起何处 迢迢送落晖 苍茫随思远 萧散逐【一作入】烟微 秋野寂云【一作方】晦 望山僧独归

始闻夏蝉

徂夏暑未晏 蝉鸣景已曛 一听知何处 高树但侵云 响悲遇衰齿 节谢属离羣 还忆郊园日 独向涧中闻

射雉

走马上东冈 朝日照野田 野田双雉起 翻射斗回鞭 虽无百发中 聊取一笑妍 羽分绣臆碎 头【一作颈】?锦鞘悬 方将悦羁旅 非关学少年 弣弓一长啸 忆在灞城阡

夜闻独鸟啼

失侣度山觅 投林舍北啼 今将独夜意 偏知对影栖

述园鹿

野性本难畜 翫习亦逾年 麋班始力直 麋角已苍然 仰首嚼园柳 俯身饮清泉 见人若闲暇 蹑起忽低骞 兹兽有高貌 凡类宁比肩 不得游山泽 局促诚可怜

闻鴈

故园眇何处 归思方悠哉 淮南秋雨夜 高斋闻鴈来

子规啼

高林滴露夏夜清 南山子规啼一声 邻家嫗妇抱儿泣 我独展转何时明【一作何为情】

始建射侯

男子本悬弧 有志在四方 虎竹忝明命 熊侯始张皇 宾登时事毕 诸将备戎装 星飞的屡破 鼓

噪武更扬曾习邹鲁学亦陪鸳鹭翔一朝愿投笔世难激中肠

仙人祠

仓岑古仙子清庙閼华容千载去寥廓白云遗旧踪归来灞陵上犹见最高峯

韦苏州集卷八

卷九

钦定四库全书

韦苏州集卷九

唐 韦应物 撰

歌行上

长安道

汉家宫殿含云烟两宫十里相连延晨霞出没弄丹阙春雨依微自甘泉春雨依微春尚早长安贵游爱芳草宝马横来下建章香车却转避驰道贵游谁最贵卫霍世难比何能蒙主恩幸遇边尘起归来甲第拱皇居朱门峩峩临九衢中有流苏合欢之宝帐一百二十凤凰罗列含明珠下有锦铺翠被之粲烂博山吐香五云散丽人绮阁情飘飏头上鸳鸯双翠翘亍鬟曳袖回春雪聚黛一声愁碧霄山环海错弃藩篱烹犊炰羔如折葵既请列侯封部曲还将金印授庖儿欢荣若此何所苦但苦白日西南驰

行路难【一云连环歌】

荆山之白玉兮良工雕琢双环连月蚀中央镜心穿故人赠妾初相结恩在环中寻不絶人情厚薄苦须臾昔似连环今似玦连环可碎不可离如何物在人自移上客勿遽欢听妾歌路难旁人见环环可怜不知中有长恨端

横塘行

妾家住横塘夫婿郗家郎玉盘的历双白鱼宝簟玲珑透象牀象牀可寝鱼可食不知郎意何南北岸上种莲岂得生池中种槿岂得成丈夫一去花落树妾独夜长心未平

贵游行

汉帝外家子恩泽多封侯垂杨拂白马晓日上青楼上有颜如玉高情世无俦【一作非无俦】轻裾含碧烟窈窕似云浮良时无还景促节为我讴忽闻艷阳曲四坐亦已柔宾友仰称叹一生何所求平明擊钟食入夜乐未休风雨???岁候兵戈横九州焉知坐上客草草心所忧

酒肆行

豪家沽酒长安陌一旦起楼高百尺碧疏玲珑含春风银题彩帜邀上客回瞻丹凤阙直视乐

游苑四方称赏名已高五陵车马无近远晴景悠扬三月天桃花飘俎柳垂筵繁丝急管一时合他垆隣肆何寂然主人无厌且专利百斛须臾一壶【一作囊】费初醲後薄为大偷饮者知名不知味深门潜醞客来稀终岁醇醲味不移长安酒徒空扰扰路旁过去那得知

相逢行

二十登汉朝英声迈今古适从东方来又欲谒明主犹酣新丰酒尚滞灞陵雨邂逅两相逢别来问寒暑宁知白日晚暂向花间语忽闻长乐钟走马东西去

乌引鸂

日出照东城春乌鸂鸂和鸣鸂和鸣羽犹短巢在深林春正寒引飞欲集东城暖羣鸂?睥睨高举翅不及坠蓬蒿雄雌来去飞又引音声上下惧鹰隼引鸂乌尔心急急将何如何得比日搜索雀卵噉尔鸂

鸢夺巢

野鹊野鹊巢林梢鸢恃力夺鹊巢吞鹊之肝啄鹊脑窃食偷居还自保凤凰五色百鸟尊知鸢为害何不言霜鸂野鹊得残肉同啄羶腥不肯逐可怜百鸟纷纵横虽有深林何处宿

鸛衔泥

衔泥鸛声喽喽尾涎涎秋去何所归春来复相见岂不解决絶高飞碧云里何为地上衔泥滓衔泥虽贱意有营杏梁朝日巢欲成不见百鸟畏人林野宿翻遭网罗俎其肉未若衔泥入华屋鸛衔泥百鸟之智莫与齐

鼙鼓行

淮海生云暮惨澹广陵城头鼙鼓暗寒声坎坎风动边忽似孤城万里絶四望无人烟又如边骑截辽水代马不食仰朔天座中亦有燕赵士闻鼙不语客心死何况鰥孤火絶无晨炊独妇夜泣官有期

古劒行

千年土中两刃?土蚀不入金星灭沉沉青脊鳞甲满蛟龙无足蛇尾断忽欲飞动中有灵豪士得之敌国宝仇家举意半夜鸣小儿女子不可近龙蛇变化此中隐夏云奔走雷阗阗恐成霹雳飞上天

金谷园歌

石氏灭金谷园中水流絕当时豪右争骄侈锦为步障四十里东风吹花雪满川紫气凝阁朝
景妍洛阳陌上人回首丝竹飘飏入青天晋武平吴恣欢燕余风靡靡朝廷变嗣世衰微谁肯
忧二十四友日日空追游追游讵可足共惜年华促祸端一发埋恨长百草无情春自綠

温泉行

出身天宝今年几顽钝如鎚【一作鈿】命如纸作官不了却来归还是杜陵一男子北风惨
惨投温泉忽忆先皇游幸年身骑廐马引天仗直入华清列御前玉牀瑶雪满寒山上昇玄阁
游絛烟平明羽卫朝万国车马合沓溢四鄜蒙恩每浴华池水扈猎不蹂渭北田朝廷无事共
欢燕美人丝管从九天一朝铸鼎降龙驭小臣髯絕不得去今来萧瑟【一作索】万井空唯
见苍山起烟雾可怜蹭蹬失风波仰天大叫无奈何弊裘羸马冻欲死赖遇主人杯酒多

学仙二首

昔有道士求神仙灵真下试心确然千钧巨石一发悬卧之石下十三年存道忘身一试过名
奏玉皇乃升天云气冉冉渐不见留语弟子但精坚

石上凿井欲到水惰心一起中路止岂不见古来三人俱弟兄结茅深山读仙经上有青冥倚
天之絕壁下有飍飍万壑之松声仙人变化为白鹿二弟翫之兄诵读读多亡过可乞言为子
心精得神仙可怜二弟仰天泣一失毫厘千万年

广陵行

雄藩镇楚郊地势郁迢嶢双旌拥万戟中有霍嫖姚海云助兵气宝货益军饶严城动寒角晚
骑踏霜桥翕习英豪集振奋士卒骁列郡何足数趋拜等卑寮日晏方云罢人逸马萧萧忽如
京洛间游子风尘飘归来视宝劒功名岂一朝

萼綠华歌

有一人兮昇紫霞书名玉牒兮萼綠华仙容矫矫兮杂瑶佩轻衣重重兮蒙絛纱云雨愁思兮
望淮海鼓吹萧条兮驾龙车世淫浊兮不可降胡不来兮玉斧家

王母歌【一云玉女歌】

衆仙翼神母羽盖随云起上游玄极杳冥中下看东海一杯水海畔种桃经几时千年开花千
年子玉顏眇眇何处寻世上茫茫人自死

马明生遇神女歌

学仙贵功亦贵精神女变化感马生石壁千寻启双检中有玉堂【一作床】铺玉簟立之一隅不与言玉体安隐三日眠马生一粒心转坚知其丹白蒙哀怜安期先生来起居请示金璫玉佩天皇书神女呵责不合见仙子谢过手足战大瓜玄枣冷如冰海上摘来朝霞凝赐仙复坐对食讫颔之使去随烟升【一作使随玄烟升】乃言马生合不死少姑教勅令付尔安期再拜将生出一授素书天地毕

石鼓歌

周宣大猎兮岐之阳刻石表功兮炜煌煌石如鼓形数止十风雨缺讹苔藓滋今人濡纸脱其文既擊既埽白黑分忽开满卷不可识惊潜动蛰走云云喘逶迤相紮错乃是宣王之臣史籀作一书遗此天地间精意长存世冥冥秦家祖龙还刻石碣石之罘李斯迹世人好古犹共传持来比此殊悬隔

宝观主白鸛鹄歌

鸛鹄鸛鹄衆皆如漆尔独如玉鸛之鹄之衆皆蓬蒿下尔自三山来【音梨】三山处子下人间绰约不粧冰雪颜仙鸟随飞来掌上来掌上时拂拭人心鸟意自无猜玉指霜毛本同色有时一去凌苍苍朝游汗漫暮玉堂巫峡雨中飞暂湿杏花林里过来香日夕依仁全羽翼空欲衔环非报德岂不及阿母之家青鸟儿汉宫来往传消息

弹碁歌

圆天方地局二十四气子刘生絶艺难对曹客为歌其能请从中央起中央转鬪破欲阑零落势背谁能弹此中举一得六七旋风忽散霹雳疾履机乘变安可当置之死地翻取强不见短兵反掌收已尽唯有猛士守四方四方又何难横擊上缘边岂如昆明与碣石一箭飞中隔远天神安志慙动十全满堂惊视谁得然

韦苏州集卷九

卷十

钦定四库全书

韦苏州集卷十

唐 韦应物 撰

歌行下

听鸪曲

东方欲曙花冥冥啼鸪相唤亦可听乍去乍来时近远才闻南陌又东城忽似上林翻下苑绵绵蛩蛩如有情欲啖不啖意自娇羌儿吹笛曲未调前声後声不相及秦女学筝指犹澁须臾风暖朝日暎流音变作百鸟喧谁家懒妇惊残梦何处愁人忆故园伯劳飞过声局促戴胜下时桑田緑不及流鸪日日啼花间能使万家春意闲有时断续听不了飞去花枝犹袅袅还栖碧树鏤千门春漏方残一声晓

白沙亭逢吴叟歌

龙池宫里上皇时罗衫宝带香风吹满朝豪士今已尽欲话旧游人不知白沙亭上逢吴叟爱客脱衣且沽酒问之执戟亦先朝零落艰难却负樵亲观文物蒙雨露见我昔年侍丹霄冬狩春祠无一事欢游洽宴多颁赐尝陪夕月竹宫斋每返温泉灊陵醉星岁再周十二辰尔来不语今为君盛时忽去良可惜一生坎 何足云

送褚校书归旧山歌

握珠不返泉匣玉不归山明皇重士亦如此忽得褚生何得还方称羽猎赋未拜兰台职汉篋亡书已暗传嵩丘遗简还能识朝朝待诏青鏤闱中有万年之树蓬莱池世人仰望栖此地生独徘徊意何为故山可往薇可采一自人间星岁改藏书壁中苔半侵洗药泉中月还在春风饮饯灊陵原莫厌归来朝市喧不见东方朔避世从容金马门

五弦行

美人为我弹五弦尘埃忽静心悄然古刀幽磬初相触千珠贯断落寒玉中曲又不喧徘徊夜长月当轩如伴风流紫豔雪更逐落花飘御园独凤寥寥有时隐碧霄来下听还近燕姬有恨楚客愁言之不尽声能尽末曲感我情解幽释结和乐生壮士有仇未得报拔劒欲去愤已平夜寒酒多愁遽明

骊山行

君不见开元至化垂衣裳
厌坐明堂朝万方
访道灵山降圣祖
沐浴华池集百祥
千乘万骑被原野
云霞草木生【一作相】
辉光禁仗围山晓
霜切离宫积翠夜
漏长玉阶寂历朝无事
碧树葳蕤寒更芳
三清小鸟传仙语
九华真人奉琼浆
下元昧爽漏【一作编】
恒秩登山朝礼玄
元室翠华稍隐天
半云丹阁光明海
中日羽旗旄节憩
瑶台清丝妙管从
空来万井九衢皆
仰望彩云白鹤方
徘徊凭高览古【或作一望】
嗟寰宇造化茫茫
思悠哉秦川八水
长缭绕汉氏五陵
空崔嵬乃言圣祖
奉丹经以年为日
亿万龄苍生咸寿
陰阳泰高谢前王
出尘外英豪共理
天下晏戎夷讐伏
兵无战时丰赋斂
未告劳海阔珍奇
亦来献干戈一起
文武乖欢娛已极
人事变圣皇弓劍
坠幽泉古木苍山
闭宫殿纒承鸿业
圣明君威震六合
驱妖氛太平游幸
今可待汤泉岚岭
还氛氲

汉武帝杂歌三首

汉武好神仙黄金作台与天近
王母摘桃海上还感之西过聊
问讯欲来不来夜未央殿前青
鸟先回翔綠鬢紫云裾曳雾双
节飘飏下仙步白日分明到世
间碧空何处来时路玉盘捧桃
将献君踟蹰未去留彩云海水
桑田几翻覆中间此桃四五熟
可怜穆满瑶池燕正值花开不
得荐花开子熟安可期邂逅能
当汉武时顏如芳华洁如玉心
念我皇多嗜欲虽留桃核桃有
灵人间粪土种不生由来在道
岂在药徒劳方士海上行掩扇
一言相谢去如烟非烟不知处

金茎孤峙兮凌紫烟汉宫美人
望杳然通天台上月初出承露
盘中珠正圆珠可饮寿可永武
皇南面曙欲分从空下来玉杯冷
世间彩翠亦作囊八月一日仙
人方仙方称上药静者服之常
绰约栢梁沉饮自伤神犹闻驻
顏七十春乃知甘醴皆是腐肠
物独有淡泊之水能益人千载
金盘竟何处当时铸金恐不固
蔓草生来春复秋碧天何言空
坠露

汉天子观风自南国浮舟大江
屹不前蛟龙索鬪风波黑春秋
方壮雄武才弯弧叱浪连山开
愕然观者千万衆举麾齐呼一
矢中死蛟浮出不复灵舳舻千
里江水清鼓鼙余响数日在天
吴深入鱼鼈惊左有饮飞落霜
翮右有孤儿贯犀革何为临深
亲射蛟示威以夺诸侯魄威可
畏皇可尊平田校猎书犹陈此
日从臣何不言独有威声振千
古君不见後嗣尊为武

櫻桐蠅拂歌

櫻桐为拂登君席青蠅撩乱飞
四壁文如轻罗散如发马尾鼈
毛不能絜柄出湘江之竹碧玉
寒上有織罗紫缕寻未絶左挥
右洒繁暑清孤松一枝风有声
丽人纨素可怜色安能点【一
作掩】白还为黑

信州録事参军常曾古鼎歌

三年纠一郡独饮寒泉井江南
铸器多铸银罢官无物唯古鼎
雕螭【一作虫】刻篆相错蟠

地中岁久青苔寒左对苍山右流水云有古来葛仙子葛仙埋之何不还耕者枪然得其间持示世人不知宝劝君链丹永【一作求】寿考

夏冰歌

出自玄泉杳杳之深井汲在朱明赫赫之炎辰九天含露未销铄阊阖初开赐贵人碎如坠琼方截璐粉壁生寒象筵布玉壶纨扇亦玲珑座有丽人色俱素咫尺炎凉变四时出门焦灼君讷知肥羊甘醴心闷闷饮此莹然何所思当念阑干凿者苦腊月深井汗如雨

凌雾行

秋城海雾重职事凌晨出浩浩合无天溶溶迷朗【一作朝】日才看含鬓白稍视【一作似】沾衣密道骑全不分郊树都如失霏微误嘘吸肤腠生寒栗归当饮一杯庶用蠲斯疾

乐燕行

良辰且燕乐乐往不再来赵瑟正高张音响清尘埃一弹和妙讴吹去绕瑶台艷雪凌空散舞罗起徘徊辉辉发衆顔灼灼叹令才当喧既无寂中饮亦停杯华灯何遽升驰景忽西颓高节亦云立安能滞不回

采玉行

官府徵白丁言采蓝谿玉絶岭夜无家深榛雨中宿独妇餧粮还哀哀舍南哭【一作田荒舍南哭】

难言

掬土移山望山尽【一作迁】投石填海望海满持索捕风几时得将刀斫水几时断未若不相知中心万仞何由欸

易言

洪炉炽炭燎一毛大鼎炊汤沃残雪疾影随形不觉至千钧引缕不知絶未若同心言一言和同解千结

调啸词二首

边马边马远放燕支山下跑沙跑雪独嘶东望西望路迷路迷路迷路边草无穷日暮

河汉河汉晓挂秋城漫漫愁人起望相思江南塞北别离别离别离离离别河汉虽同路絕

三台词二首

一年一年老去明日後日花开未报长安平定万国岂得衔盃

冰泮寒塘始綠雨余百草皆生朝来门间无事晚下高斋有情

韦苏州集卷十